

法華經大意

卷上中
下終

C40
4514
(13)



80

1 2 3 4 5 6 7 8 9

60


1 2 3 4 5 6 7 8 9

100

1 2 3 4 5 6 7 8 9

C40-4514

丁翁立產南大意及貢
家書題之武昌紫雲山
我微笑塔院廬府中水
為學者不識許出陝內
當山三世鐵牛禪譲



B 64853

法華大意序

法華大意迺廣陵大虛相師談經結案之語也。其所謂大意者。述諸佛之本懷。顯衆生之妙性。會偏圓之一致。廓宗說之通途。蓋以一大事因緣。愚小莫能頓契。諸法之實相。深妙難以言宣。故大覺初生。輒露真機。於指顧法華後唱。全彰妙體於白毫。眇目難窺。微猷曷隱。然則啓方便於九部。開實智於三乘者。特以知音遼曠。未遇當機耳。若夫潛通秘鍵。妙叶玄樞。則曲唱傍提。無非勝行。塵緣利境。等一妙心。是故舉手低頭。均蒙印記。譬猶都會大城。隨得一門而入。則八

達皆通衢矣。惟師衣珠不昧。寶所親登。旣闡義以發
金文。復徵心而提如意。奪妙解於思惟之域。洞玄旨
於威音以前。我執旣忘。妙圓斯應。是則開塔戶於舉
指。頓見古佛全身。觀龍女之獻珠。疾往無垢世界。河
沙之界。不隔塵墨之劫匪。遙入無量義三昧。坐不思
議道場。靈山一會。儼然未散。斯言信不誣矣。

嘉靖丁巳歲孟冬。天池沙門法聚謹序。

法華大意開經敘啓

夫妙法蓮華經者。十方諸佛之極證。一切菩薩之真
行。六道含靈之所迷。衆子不識之甚謗。然謗也迷也。
行也證也。有四之不同。本也體也性也理也。無四之
不一。以四之皆一。故東方有聖人生。其道同。其體同。
其言行行藏教化。乃至纖悉云爲無不同也。南北方。
上下方。盡空有二界。有聖人生。其道同。其體同。其言
行行藏教化。纖悉云爲無不同也。以四之不同。故古
時有異端出。其言不一。其好惡不一。乃至憂患恐懼。
忿懣取舍皆不一也。今時未來時。盡世代萬變。有異

端出其言不一。其好惡不一。乃至憂患恐懼忿惱取舍皆不一也。以不一故。車不同軌。書不同文。烏得大道不生謗而甚疑。所以不難於先覺。難於後學也。以同一故。天常同覆。地常同載。未嘗大道不同行而極明。所以不難於後學。難於先覺也。難於先覺故先覺明道。克苦修行。如雪山六年。少林九載。皇皇如喪家之犬。汲汲如懷渴之鹿。或解人之惑。而作諭。或洗人之非。而上書。或爲道而戮身。或扶道而去晉。或大辯而策有萬言。或深隱而言無一發。甚至於奴之狗之草之芥之。爲一言之不明也。極至於割之屠之囚之。

煮之爲半偈而可學也。嗚呼。所以難於先覺者此。不難於後學。故後學有大聖人之經明如日。有大賢人之註朗若星解。惑有高僧至論。破疑有大士宏辯。指入道之徑路弦如也。開見性之大門豁如也。肯信則直下成佛。皆居無垢世界。肯行則卽俗超凡。皆證清淨法身。况今夙承善力。際遇大明。車同軌而書同文。天同覆而地同載。異端息而大道明。謗毀消而聖教顯。欲明斯明日中觀手掌。肯入卽入。家裏拜爺娘。何艱險之有。但不肯入。實容易而不難。但不肯信。今日肯信。今日入佛之界。吾曰不

難於後學者此相質實愚魯幸人誠明之室學固淺
狹早逢覺悟之師既蒙尊衆以推行敢不罄懷而闡
演伏惟尊衆念吾佛大聖人欲正法久住之心各各
起難遭之想蓋百年如電影萬物人最靈人而不明
此道百年後雖欲人身其可得乎生生之理乾坤固
無止息之時必得人身恐造化不能專制惟願衆悉
一心回向聽說偈曰妙法蓮華七卷經此心暫離便
難明愛憎取舍千分別人我是非萬不平大海本非
魚障礙長空元任鶴飛鳴今朝良遇真如教惟願相
携入大乘

太虛自述

法華大意卷上

廣陵寶城寺沙門無相說

吳興天池沙門法聚較正

長水平林居士葉祺胤重較

妙法蓮華經卷第一

造化萬物而至神謂之妙王宰一切而不異謂之
法法卽性也妙卽心也蓋此心人人本具此性亦
人人本具然有聖有凡之差者非此心性有差乃
人悟迷之有差耳其心性本體聖人與凡夫元無
相間隔也非惟聖凡無間乃至上天下地紛紜萬

有動靜云爲亦無毫髮間隔者也。如是則妙法卽心性之別名。心性乃太極之一體。人物共備。凡聖同源。更何疑哉。蓮華者清淨無染。連續無間。亦喻此心古今無間。三世相連。色空無間。十方相連。蓋人之妙心妙性。前前無始。後後無終。大大無外。細細無內者也。經者吾佛大聖人宣示此心此性之直言也。以此言直示人心奧理。故謂之經。卷第一者。此經通有七卷。此爲首卷。故云第一。第二乃至第七可知。此經雖七軸之微實該盡三世間四法界之大道也。茲蒙尊衆命宣此經。但相才荒見淺。

不能深發秘奧。請各靜中再參。幸甚。科王問曰。妙法蓮華題目義已蒙開示至無疑。只是離却語言外。未審如何得受持。師曰。個裏本無元字脚。不須裏許更生疑。今朝舉起舊公案。萬象森羅悉受持。曰。恁麼則泥團土塊。先先佛。瓠子冬瓜上上機。師曰。大丈夫今須若此。莫教落在二三機。曰。如是則全身領荷。師曰。更待何時。

姚秦三藏法師鳩摩羅什奉 詔譯

姚秦東晉僞王也。姓姚名興。爲秦國王。此經乃秦詔命翻譯。故標其國號也。三藏乃譯僧之通稱。謂

其僧能通經藏律藏論藏也。法師能弘揚教法。堪與人天爲師範也。鳩摩羅什譯僧名也。此云童壽。謂其僧童年而有耆壽之德也。奉詔譯乃奉秦王明詔翻譯此經也。然羅什譯此妙法於東土。釋迦談此妙法於西乾。且道釋迦佛未開口。羅什未落筆作什麼生是此經之妙法。蓋此妙法。開口成雙。橫揚眉落一三。便不開口與揚眉。不免至人還檢點。舉如意云。會麼。若於此會得。上天下地。魚躍鳥飛。乃至草木昆蟲。無不爲諸人翻譯此經妙法之微義也。如或不然。各人且向山僧未開口。諸人未

到法堂。并父母未曾生。乾坤未曾判已前。着眼看。此妙法畢竟是何言句。嘆泥牛負夜到蓮池。木馬馱春來柳岸。問曰。泥牛負夜到蓮池是甚麼義。師曰。是不到而到義。曰。木馬馱春來柳岸是甚麼義。師曰。是不來而來義。曰。恁麼則明明百草頭。明明祖師意。師曰。又是不會翻譯曰。如何是會翻譯。師曰。請聽山僧一頌。妙法蓮華無一字。自來三藏錯商量。今朝更強重粘起。不似當時出水香。曰。如是則須向言前薦取。休於句下承當。師曰。具眼高人。何勞再問。

1 2 3 4 5 6 7 8 9

1 2 3 4 5 6 7 8 9

1 2 3 4 5 6 7 8 9

序品第一

妙法蓮華經五字如前說序者引起也。品者品節次第也。此品乃引起妙經之前導也。第一者此經有二十八品。此爲首品故爲第一。此說乃講家義解。如是而已。若是吾祖心法相傳。即不然。蓋斯經妙旨。在易謂之太極。在天地萬物謂之理。在造化萬變。謂之道。在人物爲憎愛取舍之主。謂之心。在動植云爲去就苦樂之覺。謂之性。然太極也。心也。性也。道理也。卽一體無二之物。吾佛大聖人由諸人日用不覺。所以放光明洞照十方三世。爲妙經。

之序引也。洞照三世。則無前際今際後際。洞照十方。則無四方八面。上下無四方八面。上下則示統體一極之元理也。無前際中際後際。則示全體一佛之天命也。舉如意云會。麼若於此會得。可謂十世古今。始終不離於當念。無邊刹海。自他不隔於毫端。其或不然。且以今日山僧舉揚爲引序。其他妙法須向靜中掃盡。萬別千差。妄知妄見。單單舉個能知覺的道理。畢竟果是何物。於此豁然有悟。當頓覺所謂妙法也。太極也。道理也。心性也。皆備於我。何嘗欠少。而向外覓哉。問曰。學人便直下承

當還成佛否。師曰：你說個承當。承當個甚麼。曰：承當作佛。師曰：是卽也是。只恐分成兩橛。曰：如何是渾淪的道理。師曰：清風兩檻竹。明月一庭松。

如是我聞

如是我聞者。集諸經通語。謂如是之經我親從佛聞。乃阿難陀尊者結集法藏之舉。表此經有所傳受而已。更無他說。然如有是有非。我有真有妄。妄我者。卽今各人四大六根身相是也。以此爲我。我爲不實。我旣不實。聞亦成妄。真我者。擬心卽錯。動念則乖。塵塵不昧。了了常知。無聲香之可聽嗅。無

形狀之可模寫。豎第三際。橫遍十方者也。諸佛指此真我爲性。卽如是經。諸佛指此真我名燈。卽如是法。用如是真實無妄之我。聽如是真法華經。則心外無法。法外無心。言心則法。法皆心。泥團土塊。糠粃瓦礫。皆自心也。言法則心。心皆法。喜怒哀樂。逆順取舍。皆妙法也。又如是者。聖人言性。言性則無有不如者也。如非者。衆人論情。論情則無有相如者也。以不相如故。六道四生苦樂升沉。本無而實有也。以相如故。萬物一馬。何真何假。天地一指。孰是孰非。如是領畧。如是融會。方可謂之如是妙。

法華經我親從佛聞。否則如是我聞之義。天地相間也。舉如意云。會麼。若於此會得。盡十方是個如字。遍萬物是個是字。通今古是個我字。卽人法是個聞字。喎。既是非干不着。平生生死。豈相關。問曰。如是說了。還當得修行也。無師曰。也當得。也當不得。曰。如何是當得。師曰。說食不能飽。畫餅豈充饑。曰。如何是當不得。師曰。一擊虛空成粉碎。千差萬別。悉無名。

一時佛住王舍城耆闍崛山中

此三句經。卽靈山佛與大衆會集之一時也。更無

他說。今欲詳講者。蓋此妙經旨趣。深固幽遠。若不字字發明。則聞者到了不知。所講者何事。故今不避旁引碎分之謂。試爲逐句重拈一遍看。夫一時者。非一非二。純真不雜。圓融妙合之時。此時也。上而無頂。下而無底。旁無邊畔。中無住處。易謂之太極。華嚴謂之法界。本教謂之法身。世通謂之道體。卽所謂之喜怒哀樂未發之先。意必固我。旣忘之後時也。又謂之上不見有諸佛。下不見有衆生。外不見有山河大地。內不見有見聞覺知時也。衆人不一。此時背覺合塵。流浪生死。聖人常一。此時耀

古騰今輝天鑑地佛者覺也。以具三覺義故譯不翻。三覺者自覺覺他。覺行圓滿。三覺具備號之曰佛。自覺卽明德。覺他卽新民。覺行圓滿卽止於至善也。止於至善之地則三祇果滿萬德功圓。新斯民之耳目則處處彌陀佛家家觀世音。明明德於自己則明徹古今道同天地。具此三覺十號圓滿萬德莊嚴轉萬物總是自己卽一心含攝十虛讚嘆不能窮思議何可得盡虛空遍塵刹之國土無不尊崇凡有血氣含識之生靈無不親仰。天中之天聖中之聖故曰佛住王舍城耆闍崛山中卽說

妙經佛所住處之靈山也。舉如意云會麼若於此會得便悟十世古今始終不離於當念無邊刹海自他不隔於毫端。一尊古佛常在靈山說此妙經。筵不曾散其或不然古佛去此遠已聞者徒增喧噪雖然如是夾路桃花風雨後馬蹄無處避殘紅。問曰如何是一尊古佛師曰見山同山見水同水。曰學人不會師曰着衣喫飯憑誰力運水搬柴用意參曰莫不參底心便是師曰認賊爲子曰如何是不認賊爲子師曰潛天同天潛地同地曰恁麼則佛身充滿於法界也。師曰木人石女本無情堪

歎世間同謗讚

與大比丘衆至心得自在。

此段經吾佛大聖人說此經相與具足大行大德出家證道果者有萬二千同住同行同乞同聽也。又比丘者梵語此云破惡怖魔乞士乞士者惟乞自濟不田不商怖魔者威德自重無障無難破惡者戒律自持如冰如霜阿羅漢者梵語此云無着不生應供應供者應受十方人天供養不生者不生一切妄想業緣無着者無諸世間情色染着諸漏已盡諸漏落情想之心從此永盡無復煩惱無

有復生世間煩惱逮得已利一切妄想智能獨斷。得大利益盡諸有結結使煩惱更不發生心得自在從此超出凡情了無拘繫得大自在舉如意云會麼於此會得一萬二千大比丘羅漢隨佛在此轉大法輪放大光明作大佛事其或不然諸人且向靜中自看看父母未曾生天地未曾立聖人未曾出世祖師未曾西來畢竟喚什麼做佛法忽然看破方悟人人本來面目其大無外其細無內其前無始其後無終豎第三際橫遍十方者也到此田地自然會得揚眉瞬目也是佛與萬二千大比

丘說法迎賓作主也是佛與萬二千大比丘說法如是乃至塵塵刹刹物物頭頭俱是佛與萬二千大比丘說法問曰只如說法說個甚麼師曰說你不薦曰只如薦薦個什麼師曰本來是佛曰只如不薦還是佛麼師曰也是佛只是不會說法曰會說法時如何師曰方薦本來是佛更聽說偈衆生諸佛一般般不信分分是自瞞普請今朝齊領悟一毫自覺大千寬

其名曰至如是衆所知識大阿羅漢等

此段經列萬二千大比丘首領名字雖各有程說

不過因德因事權標名姓據實而論卽一法身之性一法身之名也舉如意云會麼若於此會得舍利弗之大智明貫天人目犍連之神通妙超今古旃延論義辯似懸河樓馱見物的如觀掌如是乃至迦葉之第一傳心陳如之最先得度須菩提之能空萬有阿難陀之善記諸經俱在當下一時會了其或未委須向動靜中返觀自己聽經時能聽者何物着衣時能着者何人如是乃至折旋俯仰取舍進退細細籌量畢竟是何宗旨忽然於此會得始信真如界內絕生佛之假名平等性中無自

他之形像不是虛語。聽說偈曰。本無形相本無名。一有形名便不平。直下須能忘彼我。大千沙界一函經問曰。從上諸聖演教度人。至今爲甚麼度人。不盡。師曰。夢裏明明有六趣。覺後空空無大千。曰恁麼則雲開空自闊。風息水元平。師曰。不可隨語。生解曰。如何是不隨語生解一句。師曰。泥牛騎過海門東。笑殺殿前老松樹。曰。再請道一句。師曰。但行平等事。不必問前程。

復有學無學二千人至亦與眷屬俱。

復有再舉之辭。學先人皆訓爲效也。謂後覺者做

效先覺所爲。漸至於純熟自然。則名無學。此二千尼衆。比前比丘未到純熟自然。故名學無學衆。又名少知識衆。因學力淺。少人知識耳。此段經大畧如此。山野不敏。敢再以學之一字細拈一遍看。蓋志於學者有萬不同。有志於功名而學者。則功名遂而無學。非無可學。志滿已有。有志於文章華藻而學者。則出言成文。拈筆成章。而無學。至窮已有。志於神仙而學者。到成仙行空。而無學。有志於政治而學者。到國泰民安。而無學。有志於聖賢而學者。到聖賢田地。而至盡。然俱與學佛不相似。且道如

何是學佛底志。蓋果真欲學佛。志必度盡衆生。衆生情異。各不同道。必須隨類度脫。既欲隨類度脫。亦須化身宇宙。既欲化身宇宙。必當高下無方。豈可守一執固。既不守一執固。又當博通諸子百家。異道之書。既欲博通。則師亦不一。師既不一。寧可拘於教體。既不拘於教體。則此心廣大如法界。究竟如虛空。終日爲而無爲。長年作而無作。會古今於一念。收利海於毫端。與天地萬物鑄作一塊。黃金卽今古。舍靈不是兩般。白玉到此田地。强名曰道。學亦虛程。法界混融。志何用處。太極共芥子。本

是一樣稱呼。法身同鳶魚。不是兩家活計。舉如意云。會麼。若於此會得。路遠夜行難把火。大家吹滅暗中行。問曰。如何是暗中行。師曰。不見有背面。曰。如何是無背面的消息。師曰。無耳方能聽。無舌始能說。曰。學人不會。師曰。高低獄瀆。共轉根本法輪。大小鱗毛。普現色身三昧。

菩薩摩訶薩八萬人。

菩薩梵語。此云道學。摩訶薩此云大道學。謂此八萬人。皆道學中大道學人也。經意大畧如此。然講必以詳明爲要。禪乃用直指成功。今山野濫叨講

席亦辱禪門試爲諸公重拈一遍看大道之語不徒空傳其言必須真證其實可也真證道之實者往古諸佛是也學其證道之實者往古諸聖賢是也傳道知道之言者往古高僧名人是也不知道而各執一端者往古支離偏見如管窺豹只見一斑者是也嗚呼大道之體豈容易窺測容易證入而爲一乎舉如意云會麼若於此會得便見悟者悟此也參者參此也格物者格此也致知者知此也如是乃至傳道傳心明理明性傳此也明此也明此大道之體則大無不包細無不入前無不始

後無不終傳此大道之用則善無不興惡無不斷萬無不容一無不入致此大道之知則評是非准若權衡別真僞明如藻鏡悟此大道之實則往古來今不離一念一念不動往古來今天地萬物本吾一體一體不變天地萬物到此田地無一物不是大道全體無一物不是大道真名洞山麻廬陵米信手拈來趙州茶金牛飯信口吐吞其或不然更須諳緣放下萬慮冰消與蒲團打合參箇父母未生話頭忽然參透方知元來如此元來如此舉如意云嘆八萬高流來聽法鼻端依舊大頭垂問

曰如何是道。師曰何其大愚。曰學人不會。師曰用會作麼。曰恁麼則直下承當。更休擬議。師曰聽說山頌。大丈夫兮宜早早休言。今日又明朝等閑踢倒崑崙柱。風自清來月自高。

皆於阿耨多羅三藐三菩提不退轉。能度無數千衆生。

此一段經大畧舉八萬人階位德行更無他說。雖然如是若不一一細明。則聽者不知。阿耨者何意。三藐者何爲。試再以前經拈一遍看。阿梵語。此云無耨多羅梵語。此云上三藐梵語。此云正等。三菩

提梵語。此云正覺。具云無上正等正覺。無上正等正覺六字乃在古諸佛大聖人圓證之極果。六字之中。又只正等二字。乃諸佛之本心大聖之圓證。無上二字。乃讚此正等田地。更無過上之道也。正覺二字。謂到此正等田地始謂之正覺之道。故在古諸佛。到今大聖。到此正等方爲究竟。夫正等者。一般般之謂也。蓋法身正等一般般之際。上不見有諸佛之聖。下不見有衆生之凡。四圍不見有萬類之差。一已不見有三世之異。道個圓圓果海。判屬言銓。指爲上上大乘。還成露布舉如意。云會麼。

若於此會得便見得十方諸佛歷代祖師無有兩個鼻孔古往聖人後來作者只是一樣舌頭其或不然更須靜中看個一歸何處話頭久久功深忽地頓悟方自會得佛不出世祖不西來前後際斷人法兩忘山野今日講演妙經也是辨空花之濃淡較兔角之短長者也謂之正等也是三千里外問長安問曰且道如何是正等師曰你從幾時不正等曰恁麼夢裏明明有六趣覺後空空無大千師曰有言已便妨談道無物何由更惹埃曰既是妙道不離無相旨紛紜萬事總非真師曰又是不

正等曰如何是正等師曰聽說偈曰正等由來一更圓既非形像豈容言諸人果欲求根本頭上元無兩樣天

其名曰文殊師利菩薩至八萬人俱

此一段經列八萬大菩薩上首之名也然一一菩薩名有所表如文殊表智觀音表仁一十八位菩薩之表共成一佛德也山野見淺再爲諸人詳拈一看夫智者心智了了俯仰明明白不爲根塵之所幻惑豈更隨生死之所繞纏有智者故謂之妙德以用力少而得功多也又謂之妙吉祥以道

理精明行藏簡易無有不吉祥者也。故爲君者能足此智則可以令百姓如夷齊爲臣者能足此智則可以致君王爲堯舜爲父母者能足此智則可以令子孫純亦不已爲子孫者能足此智則可以致父母克明峻德爲夫者能足此智則可以加婦貞潔爲婦者能足此智則可以增夫仁義。如是乃至兄弟之相規朋友之相訓長幼之相導莫不皆以智爲之先引。至若不足此智則君臣陷於不仁不義之坑父子溺於無慈無孝之海夫婦入於怨天怨地之林如是乃至生死之相續如蟻旋磨憎

愛文纏似象溺泥皆無智者之所爲也。又仁者千古聖賢之心也爲衆善之長爲教化之源以之用於一家則一家康和以之體於一國則一國肝膽以之教於萬物則萬物活潑潑地一太極也以之歛於一心則一心真卓卓然一昆盧也舉如意云會麼若於此會得文殊與諸人共目揚眉觀音齊萬物同舌開口其或不然且向靜中自看着衣喫飯果憑誰力運水搬柴真是何能忽然會得自信道文殊與吾携水去普賢猶未折花回不爲分外如更遲疑聽說山偈大道明明不住形呼驢呼馬

強安名道人不住明明裏呼馬呼驢信口磨問曰。如何是卽今文殊大智師曰衆生怕受刀砧苦。山僧怕食衆生肉。曰恁麼則有智者趨吉避凶。師曰。不止趨吉避凶亦乃轉凡成聖。曰既吉既聖用智作什麼。師曰。隨處弘揚諸佛教隨緣廣破衆生迷。曰到什麼地方不用智。師曰同一法性共一法身曰如何是一法身。師曰都講回向。爾時釋提桓因與其眷屬萬二千天子俱至退坐一面。

此段經序法華會上諸天人王皆來聽法也。如雲從龍風從虎乃自然之道。又顯大聖人出現演教如日麗天萬類無有不覩者。又舉萬類遠近高下悉至者。大聖人威德仁慈廣大悉備不言可知。如世典所謂聲名洋溢。凡有血氣莫不尊親。蓋自古及今道德不明只是性命不明。性命若明則道德無有不明者。性卽理也。命卽我之理也。在我之理明在人之理亦明。在人之理明。在物之理益明。如是乃至盡萬有之形類極空界之紛紜理無不明。理旣明事無不明。事旣明所謂道德所謂仁義乃

至禮義教化文章刑政無有不明者也。以大聖人性明命明。名爲大經。大本。大法。大道。大德。大功。大音。大行。以具備萬德。故高下遠近。有血氣者。皆來尊親。如自身親。自身不用他教也。舉如意云。會麼。若於此會得。見其相者。無不敬。聞其言者。無不信。從其行者。無不悅。共其住者。無不一。其或不然。諸人各向肝膽上。繫個克字。如是克來克去。克到無可克處。當自覺。盡十方。是個仁善。頓忘取舍之心。極三際。是個中常圓入正等之域。到怎麼時節。聲名洋溢。巨細尊親。亦分內事。更何疑哉。問曰。如何安少者懷朋友信。

爾時世尊四衆圍繞。至一心觀佛。
此一段經的大意。只是序說妙經之由。更無他說。山野不敏。再以無量義處。禪定拈一遍看。夫無量義者。在了了。明明之際。謂之心爲塵塵利利之。

王謂之理。吾祖達磨大師自西而來不立文字。直指人心見性成佛。謂之禪。本土孔孟諸子立言設教。繼往聖開來學。謂之中庸。諸塵勞中人不明此者。謂之迷妄。聰明知此而不修行者。謂之自棄。間有知此而修行不能到此田地者。謂之不勇。有晝夜精勤竟無成實者。謂之不明。有成小聖及神仙。并能文能說能伎藝能脫化而止者。謂之不圓。有纔得悟徹便住寂滅者。謂之不大。有分彼分此執道執儒者。謂之不一。又有着衣吃飯竟不知着衣吃飯者是誰。又有只知富貴榮華不知富貴榮華。

者何人。俱謂之不悟。舉如意云。會麼。若於此會得四衆圍繞。儼然靈山初會。豈分昨日今朝。四花續紛。朗然妙經初舉。豈別西來東土。其或未委請客。發歡喜心。一心觀佛。以佛攝心。以心觀佛。工夫成片。則當自知。大千沙界海中漚。一切聖賢如電拂。無量義處。更何疑哉。問曰。如何是無量義。師曰。桃紅李白。薔薇紫薑。辣梅酸甘蕨甜。曰。如是。則心恐不能一去。師曰。隨流認得性。無喜亦無憂。曰。恁麼。則處處綠楊堪繫馬。家家有路透長安。師曰。猶是吃力。曰。如何是不吃力。一句。師曰。綠楊休繫馬。有

路卽長安。曰。恁麼則大海從魚躍。長空任鳥飛。師曰。又是放蕩。曰。如何是中庸。一句。師曰。病瘥自知。飯滋味。到家自不問。途程。

爾時佛放眉間白毫相光。至起七寶塔。

此一段經。大聖人顯本現迹。光照萬八千世界。靡不週遍。即是大無不包。細無不入。了了常知。塵塵不昧者也。於此世界盡見彼土。卽十方色空無間。於此佛處。聞彼佛說法。卽道理無間於一時。見諸比丘修行萬行。歷無窮劫。成佛度生。入大涅槃。後人起塔。卽三世古今無間。蓋妙法之體。卽人之本有妙心。大此妙心。於無邊虛空之外。不見其外。小此妙心。於無入微塵之内。不見其內。前此妙心。於無量塵沙大劫之前。不見其始。後此妙心。於無窮塵沙大劫之後。不見其終。識此妙心。則四海大聖人說道理。乃說此心之道理也。萬世大賢人行道理。乃行此心之道理也。以諸人於此心之道理。旣昧。故吾佛大聖人。於眉間光圓現此個妙心。卽十方國土圓現此個妙心。卽三世年劫。以卽三世年劫。故當知此心。不隨往而往。不隨來而來。若隨往而往。則此心早隨前前而往。何有今日之知。若

隨來而來。則此心以隨後後而來。何有今日之覺。以此心卽十方國土故。當知此心不與萬法爲侶。不與諸塵作對。以不與萬法爲侶。諸塵作對。故知此心不隨物而物矣。此心若隨物而物。見山化爲山。見水化爲水。何得卽今靈然不昧。了了常知者也。舉如意云。會麼。若於此會得。便見光明寂照遍河沙。其或未然。再聽說偈。此心元不屬根塵。細入寬包。妙更神只。爲諸人迷不悟。眉光示現本來身。問曰。如何是不屬根塵。師曰。了無名字。曰。如何是妙更神。師曰。不可自昧。曰。如何是迷不悟。師曰。認

奴作郎。曰。如何是本來身。師曰。豎窮三際。橫遍十方。曰。恁麼。則人人是佛。不須更疑。師曰。開口成雙槻。揚眉落二三。

爾時彌勒菩薩至瞻察仁者爲說何等

此一段經。大畧只是彌勒因佛放光圓現十方三世而生疑。其不知十方三世原備於我。而彌勒自狹。故有重重之間。蓋人人妙性。大而無外。上天下地。中間紛紜萬有。無不是在我妙性之實也。蓋人人妙性。微而無內。旣微而無內。往古來今。中間生滅萬別。無不是在我妙性之體也。如是則十方諸

佛念念在此妙性中成等正覺。樂者愈樂。一切衆生念念在此妙性中起輪迴見苦者愈苦。更何疑哉。舉如意云。會麼。若於此會得世尊觀明星而悟。悟此也圓悟聞雞啼而了了此也。如更有疑。各各向蒲團上三十年莫開口。返復看個父母未生已前面目。久久打成一片。當自覺知真如界內絕衆生諸佛之假名平等性中無自己他人之影像。問曰。道理本一。爲甚麼各不相顧。師曰。各不相顧者爲不知。一曰。如何是一。師曰。溪澗溝壑之歸海。敘鉢瓶盆之入爐。

爾時文殊師利至故現斯端

此一段經是文殊荅彌勒之問。言我曾於往古佛會中也曾見放光圓現十方世界會合三世時節。然後說妙法華經。今日佛旣放光圓現會合。與昔日一般。我知佛當說妙法華經必矣。此段經又謂之引古證今。古佛光中圓現十方三世全體說法華大經。今佛圓現十方三世全體亦必說法華大經。蓋此大經在諸佛大聖人之心謂之正等。正與十方三世一般般也。又謂圓覺圓攝十方三世。無有不覺也。又謂之大乘。大包十方三世無不乘載。

也。又謂之中常。不偏不倚。不更不變也。又謂之圓圓果海諸修行人。到此爲究竟之地也。又謂之深深妙處。小智小見。不能彷彿窺視也。又謂之法身道體。太極法界。乃至殊方異域。立名安號。發明此大經之大義。皆爲發明諸佛大聖人之元心也。良久。人不明此心久矣。以不明此心。故吾佛大聖人有此經之說。欲說此經。不是尋常之小事。故吾佛大聖人又從眉間放大光明。兌中圓現十方世界。融會三世時節。以爲說此大經之先兆也。若有智者。卽知世尊說經已畢。舉如意云。會麼。喎。十世古今。

始終不離於一念。無邊利海。自他不隔於毫端。問曰。如何是雨大法雨。師曰。枯槁一時新。曰。如何是吹大法螺。師曰。聾者悉皆聞。曰。枯槁見不能生。聾者見不能聽。如何。師曰。直捷根原佛所印。摘葉尋枝。我不能曰。如何是直捷一句。師曰。聽說山偈。人是佛。不須疑記。取中峰兩句詩。便就今朝成佛去。樂邦化主已嫌遲。

諸善男子。如過去無量無邊不可思議阿僧祇劫。劫之一字梵語。此間言語謂之時。阿僧祇梵語。此間言語。謂之無數。無數者。乃數目中之大數也。不

0 1 2 3 4 5 6 7 8 9 100

不可思議無量無邊俱大數目也。以人心狹小自短不自覺悟本具之性。其前前無始後後無終。吾佛大聖人。兌中融徹。往古來今。意欲人人頓悟本具之性。如是而長。如是而大也。其柰當人迷厚。猶不能領悟。所以彌勒有重重之間。文殊有重重之答。文句雖多。其大畧只是欲人人頓悟本具之性。大而無外。小而無內。前而無始。後而無終也。此兩句經文。殊雖是舉最前之遠。正欲露極後之長。試再以無數時詳講一遍看。時卽劫。如八千里方徑。厚之大石。以一錢半輕吊。百年拂一遍。拂盡此石。不見。

微塵名爲劫。無數卽阿僧祇。乃三千大千世界微塵數也。以一捻微塵尚有百萬之數。况以大千世界微塵爲數。蓋一千個天地。名爲小千世界。千個小千。名爲中千世界。千個中千。方名大千世界。以如是世界。總作微塵數。名阿僧祇也。阿僧祇。是大千微塵數。大千微塵數。名爲不可思議數。不可思議大千微塵數。名無邊數。無邊大千微塵數。名無量數。良久文殊引古證今。雖欲現示人人本具妙性。故舉大數以充廣。然本具妙性。比不齊類。不及文殊。雖有大智。旁引曲喻。亦不能盡此妙性之萬。

一妙性具體。豈容易領悟乎。諸人宜再細思。問曰。妙性具體如是難明。且道今日講演還明得也無。師曰。如一毫置於太虛似一滴投於巨壑。曰。恁麼。則道曠無涯。行人不盡。師曰。誰着你行來。曰。便如是坐斷時如何。師曰。諸佛皆稱讚。

爾時有佛號日月燈明至教菩薩法佛所護念

此段經大畧只是引古證今。更無他說。蓋自有天地人物已來。聖人間出。相貌名號各各不同。求其性善之心。則無不同也。殊方異域。立言設教亦各不同。求其性善之言。性善之教。則無不同也。頭

戴足履。身服手持。亦各各不同。求其性善之威儀。性善之恭敬。則無不同也。以世道極澆人心大繆。吾佛大聖人出現於世。說法四十餘年。談經三百餘會。人心既純。世道一厚。乃放光圓現。露一法身。意欲使人人頓悟。一法身也。其柰衆人尚迷。故彌勒有重重之間。重重問中。皆融古今於一念。收剎海於毫端之句。其柰聽者不薦。所以文殊亦有重重之答。重重答中。雖引古證今。亦融古今於一念。收剎海於毫端之句也。如無量劫前。雖遠佛具十號。與今佛具十號同。佛說法中。善與今佛說法善。

同如是乃至開權顯實會二歸一授記入滅無有不同後人舉其教者精進必成懈怠不廢亦無有不同者也舉如意云會麼若於此會得燈明不曾過去彌勒何有未來泥團土塊放大光明瓠子冬瓜熾然常說其或未然且學妙光精勤莫隨求名懈怠問曰經中大意只要攝末歸本且道經歷無數佛出爲甚麼尚三界紛紜師曰自是你三界紛紜聖人何嘗不一曰爭奈目前分別何師曰縱分別俱是辨空花之濃淡較兔角之短長曰如何是無分別師曰芍藥花開菩薩面棕櫚葉放夜叉頭曰猶是學人分別處師曰能分別者無分別

爾時文殊師利至佛當爲除斷令盡無有餘

此段經是文殊把前說重拈一遍謂古佛如此今佛亦如此乃至十方佛亦如此皆開三顯一無二道也蓋天地中間惟人最靈人之一身主宰只一個性字性若明道德仁義禮儀教化無有不明無有不是夫性者在天地造化謂之理故曰宇宙中間一理而已在我性理之私謂之情故曰三界不能超惟情爲罣礙苟能克去在我之情惟是一團天性則念念燈明說法頭頭妙光談經六度萬行

本自圓成四德三身。竟非他得。其或未然須向靜中細看。自生此身已來。十年二十年乃至七八十年。年雖見有已往之時。竟不隨已往之時所遷者。却是何物。卽知此心既不隨已往必不隨後來。既不隨後來亦不居現在。卽知此心無最初句。無末後句。亦無現在句。以無過去未來現在三世不能遷變故。十方虛空亦不能包裹。虛空既不能包裹故。卽知此心豎窮三際。橫遍十方。舉如意云會麼。我見燈明佛本光瑞如此。以是知今佛欲說法華經。其或不然。諸求三乘人。若有疑悔者。佛當爲斷。

除令盡無有餘。問曰。妙光法師是文殊前身彌勒菩薩。是求名後體。恁麼則今古宛然爲甚麼。又道本無今古。師曰。今自今古。自古知今古者元無今古。曰。如是則隨流認得性。無喜亦無憂。師曰。若存個認字。三千里外問長安。曰。如何即是。師曰。不許道着。曰。恁麼則開口成雙概揚眉落二三。師曰。聽說山偈。個裏元無古與今。化身隨類號觀音。諸人要見觀音面。山自高兮水自深。

方便品第二

方便者。卽隨方就便義也。如有大城。隨方來者。非

正一路。如東方來者從東門入。西方來者從西門入。則爲便益。非此則不方便。蓋人之備足妙性。雖人人本具。欲全體指出。縱佛聖有大辨才。必不能也。必因其已發之端。旁引曲唱。令其自悟。故名方便。如人殺物令苦。卽指曰。自性本無欲殺之理。卽教之令不殺生。又如人盜他人所愛。卽指曰。自性本無欲他盜已所愛之理。卽教之令不偷盜。如是乃至因人以見聞。自狹。卽指曰。自性廣大。包納虛空。因人以生死。自短。卽指曰。自性固久。莫究始終。如上所舉等。有萬億差別。俱名迷妄。自偏故。大聖。

人有如上萬億法門。俱名方便。舉如意云。會麼。若於此會得。諸佛不須出世。祖師豈用西來。山花開似錦。毘盧妙相。依舊莊嚴。野水湛如藍。太極圓圖。斬新拈出。其或不然。聽說山偈。自性堂堂要見聞。禽飛魚躍看精神。不然更欲行方便。甘作忙忙門外人。問曰。有一人曾來不舉步。且道是門裏門外。師曰。何止門外三千里外。曰。如何是門內。師曰。曾來不舉步。曰。恁麼。則擬心一絲。對面千里。師曰。未爲靈利。曰。如何是靈利。師曰。未出胎時。度人已畢。更討方便。笑殺旁觀。

爾時世尊從三昧安詳而起告舍利弗

此三句經是經家提起說妙法之由。講說大畧如此。然講以明白爲能。禪以入定爲要。山野旣濫講肆。亦辱禪門。試以三昧二字再細翻譯一遍。末後以禪融會看。三昧西國梵語。此國華言曰正受。正定。正心。正心者無一切心中之常也。常中則自絕忿惱憂患。恐懼好樂之心。正定者諸境不能動。誠之極也。極誠則能經綸大經。建立大法化育萬物。正受者諸事不能惑。聖人之至也。至聖則見。而民莫不敬。言而民莫不信。行而民莫不悅。正受旣聖。

之至。正定又誠之極。正心中到之常則大聖人之心。如晴空止水。杲日精金。無毫髮瑕疵也。大聖人之德。如天普覆。如地普擎。如日月普照。無偏私也。大聖人之道。如春發生萬物。如秋成熟萬物。無不善也。大聖人之量。如虛空包含萬有。如父母養育諸子。自有餘也。大哉聖人之性。以十方三世爲一體。以六道四生爲一身。如斯圓融妙會。稱讚不能及。講演不能盡。修行不能到。譬喻不能齊。强名曰三昧。三昧豈容易證入乎。吾佛於此三昧中。不見有前際。不見有後際。不見有中際。不見內。不見外。

不見中間然亦有中間內外前後等故謂之佛之三昧問曰講既明矣且道如何是禪師曰如棒打虛空棒棒不見痕曰恁麼則夢裏明明有六趣覺後空空無大千師曰亦是有無成二邊夢覺分兩法曰如何是不住二邊頓忘兩法之句師曰半夜井吞水長空雲弄風曰學人不會師曰舍利弗當知

諸佛智慧甚深無量至所不能知

此一段經言天下大聖人之心無人能知無人能識也蓋諸佛至聖之心無過去未來現在之時可

時無東西南北上下之方可方無衆生之名可名無天堂地獄之境可境博博高明廣大純一豎窮三際橫遍十方也以橫遍十方故此心無空色之間以豎窮三際故此心無古今之間以無古今之間乃前後際斷以無色空之間乃中外情忘則還一真如也前後際斷則本一圓覺也正當恁麼田地上而無頂下而無底傍無邊畔中無住處本教謂之圓體卽清淨法身儒教謂之原道卽無極而太極老教謂之一卽無極大道然此心也有窺測而知者窺測而知者乃天下有智者也有悟此心

而修行漸革平日之小者。乃天下之賢哲也。有修行工夫純一。猶帶分別念在。乃天下之小聖也。夫諸聖之心。圓滿廣大。同天地之覆載。同日月之照臨。體萬物性情而設教。故凡有血氣。莫不尊親。隨萬物方便而立行。故凡有形質。無不一體。舉如意云會麼。若於此會得。便見得山僧手中如意。却是諸人眼見。雖是諸人眼見。却是山僧手持。其或不然。更聽山偈。諸佛衆生一般眼。何事紛紜見萬差。肯把藩籬俱撤去。依然還是大人家。問曰。如何是諸佛智慧。師曰。過水脫鞋。買帽相頭。曰。此是常人。

俱會爲甚麼。道所不能知。師曰。常人過水。欲人背買帽。欲人與。曰。恁麼。則克去已私。便同佛智。師曰。一聲齊喝采。聽唱太平歌。
所以者何。佛曾親近至意趣難解。

此一段經。自問諸佛智慧甚深。小聖不知者何。向下自答。以佛曾親近百千萬億無數諸佛。非惟親近。亦乃聞其道。非惟聞道。亦乃行其道。以諸佛有如是大久遠工夫。大廣博學問。大勇猛精進大成就道德。所以有說。意趣難解。蓋諸佛大聖人之道。中庸之道。故天下可均。爵祿可辭。白亦可蹈。中庸。

不可能也。智卽般若之智。故衆生心處處能思惟。不能思般若經卽妙法華經。故大火洞然擔入乾草不燒。亦未爲難。暫讀此經爲難。大哉大聖人之道。無方故不可到。無言故不可解。無相故不可視。無意路故不可思。無柄欄故不可執。舉如意云。會麼。若於此會得。便見得道本不遠。而人自遠道本不難。而人自難。洞山麻三筋。一夏將來合繩也好。撚線也好。青州衫七筋。冬天穿上打眠也得。坐禪也得。廬陵米早炊可以作粥。晌午可以造飯。百丈尿和水。則澆茄。拌灰則栽芋。更何疑哉。其或不然。

須是諸緣放下。萬慮撥開。單單看個一歸。何處忽地頓悟。始信大千沙界海中漚。一切聖賢如電拂。到此田地。佛法世法。打成一片。凡情聖情。元沒兩般。更聽說偈。自家一個黃金面。世世生生被土埋。香水滿盆能一洗。光明依舊照靈臺。問曰。如何是黃金面。師曰。萬劫無更變。曰。如何是被土埋。六道自輪迴。曰。如何是能一洗。師曰。四相頓空爾。曰。如何是照靈臺。師曰。三身圓證來。曰。此大似講說。師曰。誰爲你說禪。

舍利弗。吾從成佛以來。至令離諸着。

此一段經。世尊自陳自成佛以來。四十餘年演教。只是要人離着。蓋着者。心入諸境。不能遠離是也。境有有情境。有無情境。無情境者。大而天地細而微塵。衆而萬有紛紜。一而太極全體。但無知覺。各無情境。有情境者。大而覺體。細而含靈。衆而萬類。升沉。一而法身不動。但有知覺。各有情境。如是乃至眼所見。耳所聞。鼻所嗅。舌所嘗。身所覺。意所思。或順或逆。或近或遠。或善或惡。或親或疎。俱名爲境。於此境上不能消融成一法身。不能明了成一佛知見。俱名爲着。以衆人不能離此着故。吾佛大

聖人以六度萬行。種種因緣譬喻言教。方便廣談曲論。四十餘年。無他意。只是要人離着。舉如意云。會麼。若於此會得。青青翠竹。總是法身。鬱鬱黃花。無非般若。鳶飛魚躍。與四十餘年演教無差。雨施雲行。與三百餘會談經不異。其或不然。更須提個父母未生前話頭。工夫純熟。忽然頓悟。到此田地。方自悟得截瓊枝。寸寸是玉。析栴檀。片片皆香。無淫怒癡可去。如一輪明月掛秋空。無戒定慧可修。似一點寒冰烹大冶。更聽說偈。通身是病。通身藥。身若空來藥亦空。我許道人俱勘破。泥牛騎過。

海門東。問曰。如何是諸着。師曰。眼見耳聞。并意想。曰。如何是離諸着。師曰。眼無見耳無聞。意無想。曰。恁麼。則木人撫掌。石女謳歌。師曰。不可墮在無事界裏。曰。如何是中庸。一句。師曰。恁短恁長。休剪綴隨高隨下。自平治。

所以者何如來方便知見。至唯佛與佛乃能究盡。此一段經。大畧只是極讚大聖人之心。究竟盡明了。誠實廣大。非世間小聖小智。小見小解。所能窺測者也。試再以目前淺小比並。一遍看。蓋世之言壽者。廣成子。千二百歲。彭祖八百歲。至壽者。天地。邵

子推之。謂有十二萬九千六百歲。未有如佛言壽。以三千大千世界微塵數歲。猶爲至短。世之論國一統者。不過四海九州之內。一萬八千之中。至廣者。不過日月出沒之際。星辰旋繞之間。未有如佛之言。日月出沒之際。星辰旋繞之間。乃一須彌盧耳。如是千須彌盧。謂之小千世界。如是千小千世界。如是千大千世界。微塵數大千世界。始是一層。如是八萬四千層。始是一華藏世界。如是一華藏世界。微塵數華藏世界。名爲一毘盧遮那佛王化。

1 2 3 4 5 6 7 8 9 100

法華大意

如是毘盧遮那佛不知其數。豈國土世界能知其數。如是乃至論理論事。唯佛甚深。世莫能及。又有謂佛言雖廣大無實。自是人不靜思。肯靜思則其實。自性之理。大而無外。非有形國土。可能充滿。細而無內。非有智聰明。可能見識。舉如意云。會麼。若於此會得。一月普現一切水。一切水月。一月攝。如帝網珠。光光互照。無前際。無後際。無南方。無北方。圓陀陀。活潑潑。捏不成。劈不開。其或不然。更聽說偈。人人心卽古毘盧聲色門頭有。卽無。但肯回光。光自照。乾坤何法可親疎。問曰。諸佛既多。世界不

少。畢竟是一是多。師曰。非一非多。曰。如何是非一非多。師曰。一有多種。二無兩般。曰。恁麼。則論理元非二。隨情有萬般。師曰。文字之師。皆如是見。曰。如何是離文字一句。師曰。老虎看水磨。轉看轉不知。諸法實相。至究竟等

此一段經言。諸法實相。卽目前萬法。正妙經本意。卽十方諸佛圓證之實理。十方諸佛圓證之實理。卽衆生本具覺性。衆生本具覺性。卽世間流轉苦樂升沉之境。以衆生不悟諸法。不了諸法。不知諸法。癡癡昧昧。於此境上起惡心。作惡業。死此生彼。

展轉流浪受苦無窮。故大聖人指此諸法謂之夢幻。謂之泡影。令人於此諸法境上求個無相無名。不動不變的真理。以聲聞小乘人不識諸法圓理。於此境上厭苦求樂。破有執空。故大聖人又指此諸法卽是真空。卽是妙有。令人於此諸法境上求個圓融妙會的覺性。以菩薩大乘人未知諸法實相。劫劫苦修。世世力進。務欲度盡衆生。必要證極大道。故大聖人又指諸法卽是實相。卽是法性。卽是佛理。蓋諸法實相之妙。參此儒謂之格物悟此儒謂之致知。知至物格。則諸法實相了了常知。明

明不昧者也。以至修身齊家治國平天下。無不靈驗。以至超出生死。亘古亘今。以至頓入涅槃。徹上徹下。無有不妙應者也。舉如意云。會麼。若於此會得。松直棘曲。鵠白烏黑。皆實相之體。生迷佛悟。事俗理真。皆實相之用。其或不然。明日再爲諸人打葛藤一遍。問曰。目前諸法皆實相。因何人不覺悟。師曰。不是不悟。只是不肯悟。曰。學人參亦有年也。是不是不肯悟。師曰。旣肯悟。今日又問什麼。曰。肯悟時如何。師曰。諸法無非實相義。

諸法實相

至本末究竟等

重拈

卷六

法華大意上

三

此一段經。南嶽天台諸師講各不同。惟溫陵環師講爲切當。今依環師重拈一遍看。夫實相者。卽相而真。與十方往古大聖人同體無異。圓常明妙。更無變別之法性也。然此法性。惟佛與佛乃能究盡。故經云。佛所成就第一希有難解之法。惟佛與佛。乃能究竟諸法實相。諸法者。乾坤萬有紛紜。總不出十法。十法者。一相。二性。三體。四力。五作。六因。七緣。八果。九報。十本末究竟。本末究竟者。一切目前萬法。一一皆有根本。終窮。一一皆有窮盡。實際。如目前卓子香爐。乃至松樹桃樹人物等類。不能窮

盡。實際不足謂之格物。不能究竟根本。不足謂之參禪。亦不謂之徹悟。亦不足謂之致知。致知徹悟。則目前卓子香爐。松樹人物。無不能格無不能參。其本末究竟者也。再以十法細拈一遍看。報者。應果爲報。如一樹桃子旣實爲果。果熟爲報。果者。緣熟爲果。如一樹桃子旣開花結實。雨露潤滋糞土。封培。到香熟時節是也。緣者。助因爲緣。如一樹桃子。雖開花榮茂。若無雨露糞土。封培爲助。終不能自榮自華。自果因者。資始爲因。如一樹桃雖目前榮茂。其根本必有最初之日。作者。乍起爲作。如

法華大意

一樹桃雖有最初之日。種桃之心乃乍然而發起也。非固有之性也。力者利用爲力。如一樹桃到香熟時。食得其味。賣得其財是也。體者形具爲體。如一樹桃或花或果枝葉散殊。根本深厚是也。性者相本爲性。如一樹桃爲相亦必有一樹桃之根性也。相者可見爲相。如一樹桃開花結果人人皆見所謂其性其實。其本末究竟人皆不知。故唯佛與佛乃能究盡明了而無虛妄。其他聖人雖明不能究盡。

唯佛與佛乃能究盡諸法實相

至本末究竟再拈

此段經已講兩遍。今當第二遍聽者亦莫厭煩。蓋此段經乃格物之要端。叅禪之正軌。若不細細條陳。晚學終莫入頭。相才雖不敏悟亦有宗試。再以此經大畧拈一遍看。夫世間萬法紛紜。不亦千變萬化。故謂之諸法。雖不可一一指陳。總其切要不過此十法可以盡無餘蘊矣。一如是相者。即是總指萬有紛紜。千變萬化。眼可見之相狀也。然此相小聖無竪窮三際橫遍。十方不可思議大眼目。局於世間。聞見之狹者。相雖可見。亦不能窮盡無餘。故唯佛與佛乃能究盡。一如是性者。卽我與萬物。

形狀雖殊。究其根本。無不一也。一即是性。性卽理也。此性此理。雖有一名。無二體也。故強謂之性。性也者。大而無外。細而無內。前而無始。後而無終。大聖明賢。指爲圓覺。太極。大道。元體。上帝。明德。中庸。法身。亦不能盡此性。溥博淵泉。廣大悉備。之全體也。故曰。唯佛與佛。乃能究竟。乃至如是體。如是力。如是作。如是因。如是緣。如是本末。究竟等。皆唯佛與佛。乃能究竟。非世間小聖。可能盡知也。舉如意云。會麼。若於此會得。可謂道是法住法位。世間相常住。其或不然。須向靜室中。焚香默坐。參此山僧。時如何。師曰。大地是黃金。

如是體。如是力。至本未究竟等
復講

形具爲體。利用爲力。蓋有如是體相。則有如是利用也。如有三十二大人相形體。則有王化三千界之利用。如有清淨遍一切處之體。則有周遍十方。

融徹三際之利用。如有牛之形具。則有耕耜利用。馬之形具。則有馳驅利用。如是乃至誅草割人。覓苴剖鱉。水銀可以化金。硫黃可以乾汞。蓮華大藥。服之則與日月齊壽。準提真言。誦之則與乾坤等倫。此皆常聞之語。至如擬心卽錯。動念卽乖。旃延之口不能談舍利之智。不能測之大體大力。却又能盡知。誰能見其形具。能知其利用哉。旣形具利用不能盡知。則如是作。如是因。乃至如是本末究竟等。又豈能盡知。故曰。唯佛與佛乃能究盡。其他非通不知。不能盡知也。舉如意云。會麼。若於此會得。會

古今於一念。收刹海於毫端。其或不然。且向靜中。默默再看。生從何來。死從何去。忽然頓覺。當自信知。海底金烏天上日。眼中童子面前人。更說甚麼。唯佛與佛乃能究盡。喎。更聽說偈。乾坤萬別千差。體根本由來一個身。於此一身心。亦一頭頭物。物總天真。問曰。如何是成佛之因。師曰。善則力行。曰。恁麼。則見善則修。逢惡則止耶。師曰。聖聖相傳。無異語。曰。死來畢竟作麼生。師曰。若見有死。猶是道眼不明。曰。道眼明時如何。師曰。本無生死。曰。目前生生死死。無有了期。何得言本無生死。師曰。唯佛。

與佛乃能究盡。

如是作如是因。如是緣如是果。如是報。復講

乍起謂之作。資始謂之因。助因謂之緣。緣熟謂之果。應果謂之報。如人忽起一念害人之心。資此心爲始。後逢同欲害其人者相助。則乍起害人之念成矣。害人之事既成。豈無後來害已之報。又如人忽起一念欲成佛之心。資此心爲始。念念不息。後逢同欲成佛之人爲緣。共修六度萬行。則三十二相八十種好。萬德莊嚴之佛果必成。佛果既成人天瞻仰。十方稱讚。豈是無應果之報。蓋世萬法總

不出如是性相等十法。如是十法又總不出性相因果四字。以有如是因。必有如是果。有如是相。必具如是性。先聖所謂天生蒸民。有物有則。又云。出乎爾者反乎爾者也。世所謂種瓜得瓜。種豆得豆。作善見善。作惡逢惡。又因心作業。因從性之覺。緣熟爲果。果因性之相。性相因果。展轉升沉。小聖不能盡知。唯佛乃能究盡。舉如意云。會麼。若於此會得。可謂道夢裏明。明明有六趣。覺後空空無大千。又不止於有六趣。空大千而已。其或不然。聽說山偈。本具圓明淨覺身。元非因果及根塵。當人肯息最

初念法界依然只一真。問曰。如何是一真。師曰。仁者見之謂之仁。智者見之謂之智。曰。恁麼則道本一體。見有多端。師曰。我亦不知。曰。既不知爲恁麼高談闊論。師曰。爲你不知。曰。知則如何。師曰。法界無二相。

爾時世尊至言辭相寂滅

此一段經。大畧重頌諸佛權實二智。權智者。借事明理。借世間文字語言。以明無文字語言之實理。實智者。一切諸法之實體。文字不能彰。言語不能覆。無起無滅。無成無壞。非同暫借不實之道也。十

方諸佛。往古諸佛。現今諸佛。未來諸佛。設教化。建法幢。度衆生。莫不皆以權實二智爲化度門。然權智權設三乘。實智實示一法。而人皆不知。諸佛本懷諸佛本懷者。不徒自誇。權實二智。單單欲露人。人本具圓常覺體。大而更無有大。小而更無有小。初而更無有初。末而更無有末者也。蓋此圓常覺體。衆生迷而流浪六趣。諸佛悟而高超萬有。又此圓常覺體。衆生諸佛之本根。法界真如之實際。所以諸佛悟而常一。衆生迷而常萬。以常萬故。一切衆生卒不能會歸一佛乘。以常一故。十方諸佛竟

不能散流衆生界內。舉如意云。會麼。若於此會得
權也是實。也是權實。總不是。權實總皆是。其或不
然。須向父母未生前。佛祖未開口已前。默坐自參。
參來參去。工夫打成一片。當自大悟。窮諸玄辯。似
一毫致於太虛。竭世樞機似一滴。投於巨壑。其圓
常覺體。本非語言文字可以指陳。如更遲疑。聽說
山偈。本來圓滿大光明。迷自遷流萬不平。直下頓
能開活眼。不須重演妙蓮經。問曰。諸佛重重開示。
爲甚麼諸人不悟。師曰。自你不悟。曰。旣悟爲什麼
明日又講。師曰。雖是舊時天上月。一番觀看一番
都放下。四相頓空來。

新曰。通不舉着時如何。師曰。不免一生鶻突。曰。時
時舉起時如何。師曰。杲日正中天。雲霞俱散盡。曰。
正當恁麼時。還有不具眼者麼。師曰。講座案前圍
裙。盲者亦不能見。曰。如何能同一佛眼。師曰。萬緣
都放下。四相頓空來。

諸餘衆生類_五一心共思求。亦復不能知。

此一段經頌。實相妙法。如衆生羅漢菩薩所不能
知。蓋實相妙法。在山同山。而不與山同起滅。在水
同水。而不與水同有無。如是乃至在萬物同萬物
而不與萬物同生死。故曰。是法不可示。言辭相寂。

滅舉如意云。會麼。若於此會得。便見得心同虛空界。示等虛空法。證得虛空時。無是無非法。不是鑿空說出。鳶飛戾天。魚躍於淵。上下昭著。不是無本之語。其或不然。須是向二六時中。靜靜看個萬法歸一一歸何處。工夫打成一片。當自覺知。一月普現一切水。一切水月。一月攝也。猶是指東畫西。何故實相妙法觸事而真。擬之卽差。言之卽乖也。如更胸中窒礙未消。請聽山野說偈。法法本來無欠餘。不消於法強親疎。肯能直下空思慮。生佛何曾別兩途。問曰。猶是學人疑處。請向切要處併却咽喉。唇吻四句。顯示實相妙法。師曰。併却咽喉閉却唇。十方諸佛許渾淪。當人切記渾淪裏。分一分三。自失真。曰。恁麼。則開口成雙概。揚眉落一三。師曰。開口也是。揚眉也是。曰。如是。則但莫憎愛。洞然明白兩句。便是祖師西來意。師曰。更聽說偈。佛祖相傳此個心。人人本具。莫追尋。愚癡更問西來意。如把黃金去換金。

又告舍利弗。至世尊法久後要當說真實。不爲說。此十二句頌。大畧只是言此實相妙法。唯佛能知。餘不能了。當生大信。佛語真實。且道大信信個什。

麼。良久。僧問洞山如何是佛。山云。麻三觔。諸人還信麼。又僧問趙州如何是祖師。西來意。州云。庭前栢樹子。諸人還不疑麼。於此二事若是通不疑而生大信。則可謂截瓊枝。寸寸是玉折梅檀。片片皆香。如或不然。疑心更起。縱有多智。如河沙數。一心思求。亦不能知。舉如意云。會麼。若於此會得。可謂道水不洗水。金不博金。又可謂人人頭上青天。元是一樣個個脚下黃壤。豈別兩般。又可謂千紅萬紫。雖然別信道。春風沒兩般。如更躡蹠。聽說山偈。一覩明星悟徹來。十方諸佛眼同開。當人於此更

分別。萬劫千生。未可猜。問曰。經云。當生大信。畢竟信個什麼。師曰。要信自己與佛無二。曰。學人亦信爲甚麼。不與佛一般。師曰。因你信不實。所以不與佛一般。曰。與佛一般時如何。師曰。唯佛知是相。十方佛亦然。曰。恁麼。則迷則衆生悟。則佛不消更疑。師曰。更聽說偈。迷時悟後。主人翁。諸佛衆生本一同。普勸諸人齊徹悟。千差萬別。自然空。也不脫灑。更聽說偈。迷時悟。亦是真常悟也。元無第二光。徹底掀翻華藏海。十方諸佛共思量。

告諸聲聞衆。王引之令得出

此八句偈頌佛初說種種法門。教人修行。有證聲聞者。有證辟支者。有證菩薩者。皆方便誘引令脫苦離著也。蓋苦有多種。總之只二著。有多種。總之亦三著。一我著。二境著。三情著。情著者。以被色聲香味等迷。留情不舍。故名爲著。着卽生苦境著者。以不悟色聲香味等。當體卽真。於此境上種種分別。取舍愛憎。故名爲著。着卽生苦。我著者。以不悟本具法身。大而無外。細而無內。前而無始。後而無終。認此父母所生形體爲自己。以認此身爲自故。則有生生死死之貪惡。上上下下之欣厭。

以有貪惡欣厭故。則有無量之苦隨之矣。三苦者。一死苦。二刀杖苦。三不如意苦。不如意苦者。以不悟色聲香味等。具爲夢幻。種種取着。取之不得。故名爲苦。刀杖苦者。以貪色聲香味等。貪之不遂。遂生嗔怒。加以刀杖。作既有自報。亦必然受他刀杖凌逼百種。故名爲苦。死苦者。以有父母所生之形。必然有死。死則與世永別。不能後活此身。故名爲苦。如是三苦三著。俱是不悟本具清淨法身。著於諸境。苦受百端。故諸佛大聖人種種方便教化。令離著脫苦也。舉如意云。會麼。若於此會得。十方坐。

斷三際融通諸佛不曾出世。衆生本不沉淪。其或不然。聽說山偈。人人本具圓明體。諸佛衆生總一般。自是不能離執着。難逃苦楚萬千端。問曰。如何是具足圓明體。師曰。能問者是誰。曰。恁麼則六根門首無人會。惹得胡僧特地來。師曰。錯認定盤星。曰。不錯認時如何。師曰。能問者便是。曰。古人謂之認識神。意旨如何。師曰。你有幾個識神。曰。恁麼則百年三萬六千日。返覆元來是這漢。師曰。放你三十拄杖。

爾時大衆至則生大歡喜

舉爾時大衆至而今不知是義所趣。此一段經。科家謂之衆疑請問。衆疑則疑。佛平日不自誇道德。今佛自誇道德智慧。非三乘人所知。請問則問。佛所得深智。願佛宣揚。再舉爾時舍利弗至難解之法。此一節經。科家謂之身子發問。再舉爾時舍利弗至欲聞具足道。此一節經。科家謂之重頌疑問。再舉爾時佛告舍利弗至則生大歡喜。此一段經。敘衆欲聞大法。佛不肯說。身子三請。佛將爲說。蓋此大乘妙法。卽人人本具妙性。人人本具妙性。與十方諸佛歷代祖師了無毫髮間隔者也。世人迷

此妙性隨物變遷。所以有六道四生也。至人悟此妙性。轉物爲已。所以有三身八解也。舉如意云。會麼。若於此會得。毛呑巨海。芥納須彌。轉萬物。即是自己似水投水化。自己即是萬物。如空合空。俱非難事。如其纖塵未消。不免山是山水。是水毫髮不能相通。良久還委悉麼。聽說山偈。衆生諸佛性無差。生旣迷來。佛乃誇。肯向今朝齊領悟。大家同駕白牛車。問曰。諸佛衆生不同。病在甚麼處。師曰。佛能克已。衆生不能克已。曰。恁麼。則克已名爲佛。師曰。縱不成佛。也是善人君子。曰。不克已。肯如何。師

曰。三途苦百端。曰。克已時如何。師曰。三身四智。八解六通。曰。講師答語爲什麼與禪不同。師曰。你喚甚麼作禪。作講。曰。講卽高談闊論。禪卽棒喝交馳。師曰。正是辯空花之濃淡。較兔角之短長。曰。如何是到家一句。師曰。聽說山偈。妙性人皆具一個。緣何東問復西慕。佛雖三止。不須言。也是人情不會做。

法華大意卷二

法華大意卷二

卷二

佛來問舍西暮識難三重不從言。達長人謂不會。
張良處。一付衲曰。禪爲山岳。妙入骨髓。具一目。能
照。王吳辨空亦之。號火婢。象鼻之。亞夷曰。噭。臣
共。齋。卦。難。打。難。日。勸。唱。高。美。聞。禽。消。舉。闡。文。課
職。大。萬。日。輪。稻。寺。苦。爲。升。愁。與。斯。不。同。衲。日。噭。
曰。三。錢。苦。百。識。日。烹。日。押。吹。所。衲。曰。烹。四。音。入。

法華大意卷中

廣陵寶城寺沙門無相 說

大乘部公首當計。廣陵寶城寺沙門無相。說
小乘部最後來。參吳興天池沙門法聚。較正
歸。者。也。小。大。外。事。長。水。平。林。居。士。葉。祺。胤。重。較
爾。時。世。尊。告。舍。利。弗。
至如。是。妙。法。

此經向後科家謂之正說妙法。又有四科。初許說
再舉說。此語時至默然而不制止。此兩行經。科家
謂之上慢退席。再舉爾時佛告舍利弗。我今此衆
至願樂欲聞。此兩行經。科家謂之衆淨誠聽。再舉
佛告。至如是妙法。此段經。向後方是正說。如是妙

法四字。直指妙法全體也。舉如意云會麼。於此領悟。會我相人相衆相壽相。如紅爐片雪了。無踪跡。消卵生胎。生濕生化生。若大夢暫思。那討根由。鑄萬象總作一金融。萬古卽是一念。到此田地。處處彌陀佛。家家觀世音。其或不然。須向靜中回光自照。此身乃父母之遺體也。那個是父母未生之身體乎。此心乃根塵之發知。那個是根塵未有之本心乎。如是參來參去。不計工夫。必有大悟時節。到大悟時。必當自信眼見之形相。妙法之全體也。耳聞之音聲。妙法之圓宣也。鼻嗅之香臭。妙法之至

信也。舌嘗之滋味。妙法之醍醐也。如是乃至身觸意緣。鳶飛魚躍。雲行雨施。無有不是妙法之全體。大用也。靈山一會。儼然不散。妙經宣揚。滿眼滿耳。到這裡。且道還容註解也。無若許註解。須彌爲筆。大海爲墨。虛空作紙。經千萬億劫註亦不盡。若頓領悟。道個一念不起。猶是須彌山。豈許心意十度。語言分疏者哉。問曰。妙法四字。既是全體。且道離此四字之外。喚作什麼。師曰。不許安名。曰。旣不許安名。諸佛全體爲什麼。云如是妙法。師曰。安名也。安名只怕人錯認。曰。錯認時如何。師曰。我相人相。

曰不錯認時如何。師曰人空法空。曰恁麼則道馬非爲馬。言牛未是牛。兩頭俱坐斷。中道一齊休。師曰都講廻向。

諸佛如來時乃說之。至欲令衆生入佛知見道故。此段經大畧言此妙法不是尋常語言文字。雖有語言文字。乃宣揚妙法之語言文字也。此語言文字實非妙法。又再三誠之當信佛語。蓋妙法卽當人妙心。若不信是自棄耳。又曰。是法非思量分別之所能解。蓋思量便屬情解。自心之妙失矣。又曰爲一大事出現於世。如是則大事卽本妙心體強

名佛知見。旣不許思量。從何領信。旣信妙法。不許思量。却是望空而信。旣望空而信。信個什麼。蓋此實相妙法。雖語言道斷。心行處滅。亦不離語言文字也。故曰。文字顯總持。總持無文字。舉如意云會。麼。若於此會得。便信與三世諸佛共一心膽。便信與歷代祖師共個肚腸。七軸妙經。仰觀也看着。俯察也看着。三世諸佛進前也相逢。退後也相逢。如其不然。須向靜中放下千斤名利擔。收回一點是非心。單單看個天地未曾判。父母未曾生。我今日能知能覺能喜能怒者。畢竟在什麼處安立。忽然

參透當自大悟。無一物不是妙法全體。無一名不是妙法全號。到此田地。生死乃我心之活相。聖凡亦吾性之假名。苦樂逆順。水底月痕。動靜寒溫。天邊鳥跡。更何疑哉。問曰。如何是一大事因緣。師曰。諸佛爲此出現。曰。諸佛出現且止。如何是一大事因緣。師曰。講一月已來正爲此事。曰。講論已承妙語。且道如何是一大事因緣。師曰。老者安。少者懷朋友信。曰。孔聖以此三事爲本懷。莫便是一大事因緣麼。師曰。且到此田地。再問一大事因緣。曰。恁麼則從淺至深。從近至遠去。師曰。本無深淺遠近。

曰。如是則道曠無涯。師曰。也不是。曰。如何即是。師曰。且回向看。

諸佛世尊唯以一大事因緣故出現於世。

復講

此一科經。合宗謂之標出本意。卽是標出諸佛出世一番的主意也。蓋吾佛大聖人普觀盡虛空遍法界。皆是一箇妙性。皆是一箇妙理。既是一箇妙理。卽是一個妙心。既是一個妙心。卽是一個妙法。妙道也。以人人具足此性。旣具足此性。卽具足此理。旣具足此理。則此心此法此道無不具足圓滿者也。但人不肯靜中自參究。自格窮耳。若肯靜中

1 2 3 4 5 6 7 8 9 10 1 2 3 4 5 6 7 8 9 10

自參自格。則此本具妙性。何有不明。何有不悟。以人各各迷久。俱不自悟。吾佛大聖人乃出現於世。欲人人皆悟。本具妙性也。欲人皆悟此性。所謂一大事因緣也。謂之一大事因緣。世間萬事萬物。大而天地。細而微塵。既屬有形。終成敗壞。既有敗壞。非吾妙性實相。既非妙性實相。乃是性中之妄念也。既是性中之妄念。亦非妙理實體。既非妙理實體。豈是妙心妙道也。以此妙性。性一切而不異。妙萬物而至神。能爲萬象主。不逐四時凋之物也。以此萬有。大而天地。細而微塵。起起滅滅。往往來來。

故所以謂之小事。以此妙性大而無外。細而無內。無起無滅。無往無來。故所以謂之大事。若知此爲大事。則若身若眷屬。若功名。若產業。乃至事業有天地之太。亦爲小事。以世人不知此爲大事。汨汨爲身。只家火眷屬所累。既被此累。則不知本具之理。以豎窮三際。橫遍十方也。舉如意云會麼。更聽說偈。本具妙心。卽妙性。聖人號做大因緣。諸人直下如明悟。不負西乾大覺。僊問曰。如何是直下明悟。師曰。眼空四海。神洞十虛。曰。如何是妙性。師曰。非妙不能問。非性不能言。曰。恁麼。則喜怒哀樂的。

主人翁便是妙性。師曰認賊爲子。曰中峰道卽此與佛祖無間。又作麼生。師曰中峰卽是。是汝不是。曰如何是妙性。直捷一句。師曰。問處分明。答亦分明。不須更疑。

佛知見

再拈

佛知見者。卽本具性妙覺體也。此性妙覺體。雖人本具。迷背不知者極多。故十方諸佛出世。開示。開示此性妙覺體也。歷代祖師傳授。傳授此性妙覺體也。蓋此性妙覺體。陰陽不能變造化。不能遷虛空。包不住。大地載不起。大地廣博。爲性覺中塵。

虛空冲漠爲妙體中隙。萬物衆多爲妙性中間錯。古今遠遠爲覺體中念慮。不可以相可以盡。此妙性之相。故曰不可思議。不可以名。可以正其覺體之名。故曰無有能得解。非思量分別之所解。非色相大小可以指畫。故曰唯佛與佛。乃能究盡。仰觀俯察。遠取近求。無有不是其體。故曰體物而不可遺。上而諸佛。下而衆生。中而覺知。外而器界。俱元一體。故曰唯此一事實。餘二則非真。舉如意云會。麼。若於此會得。十方不隔。三世不遷。頭頭總是。物物全彰。無一名不是其名。無一物不是其物。說是。

麻三觔也是說是柏樹子也是。鳶飛魚躍多寶佛塔而見瑞騰祥雨施雲行妙莊王宮而放光散彩其或不然佛知見再參三十年更聽說偈能知能見處靈然迷乃凡今悟乃仙我許當年圓悟老一聲雞唱證根源問曰如何是根源師曰本具如是妙性曰如何是妙性師曰舉似不得曰既是本具爲什麼舉似不得師曰舉似成兩個曰恁麼則通不許開口師曰膠柱鼓瑟釘椿搖櫓曰如何是不犯鋒芒一句師曰山僧早辰洗面摸著底不是他入鼻子曰請聽學人說偈自家靈妙古人心多少

愚迷向外尋今日蒙師親點破大千刹海變黃金
師曰何不道刹海本黃金

舍利弗是爲諸佛至尚無二乘何況有三

此一章經大畧只是言十方大聖人性道無有不同往古大聖人性道無有不同後來有大聖人性道無有不同以無有不同故當知人人本具之性理亦無不同以物物之性理同故仰觀俯察遠取近求性理無有不同以無不同故當知知見亦無不同者也或有不同者非中心不同乃各各自私

自昧自別。自向所以有萬不同也。苟能克去各各自私之執著偏邪。自昧之無明煩惱。自別之憎愛。取舍。自向之苦樂逆順。則所謂一佛知見。一佛乘。一大事因緣之性理。無有不同者也。夫所謂一佛知見。一佛乘。一大事因緣。卽人人本具之性理覺體也。蓋此覺體。論其大而更無有外。論其細而更無有內。論其前而更無有始初。論其後而更無有終窮。圓融廣大。冲虛妙粹。稱之不能盡其言。故曰不可思議。窺之不能盡其際。故曰聲聞辟支佛所不能知。以此佛知見之體。人人本具而不自知。故

十方三世大聖人生大憐愍。出見於世。單單開示此佛知見。令人悟入也。舉如意云。會麼。若於此會得。便見十方不隔。三世道同。其或不然。則各自偏。各自昧。萬別千差之條貫。橫羅豎數之遍該。山僧不能把手與諸人拈出也。更聽說偈。頓空四相。自忘機。此是如來妙總持。不爾更他求妙道。我知終與性非宜。問曰。如何自妙總持。師曰。當人妙性。曰經云。非思量分別之所能解。和尚爲什麼却道當人妙性。師曰。你道妙性是什麼物。曰出身猶可易。脫體道應難。師曰。你也不能道。曰學人脫體。

固不能道。請和尚道一句看。師曰。你起來我回向。
 舍利弗諸佛出於五濁惡世。至於一佛乘分別說三
 此段經。大畧只是言諸佛出世之由。蓋至理本寂。
 萬法本如。因衆生迷妄入心不自覺知。如澄清水
 攬動不息。不覺渾濁。所以時漸澆薄。惡事日多。煩
 惱日增。差別之念日盛。紛紜之境日異。致感生死
 壽命日短。名爲五濁。故吾大覺慈尊愍一切衆生
 流入苦海。展轉相因。無有出期。由是出見於世。以
 大方便於一佛性理之中。分別三乘。雖說三乘。終
 顯一佛乘性理也。舉如意云會麼。若於此會得。便

得本具妙性。前而無始。後而無終。何有劫濁之時。
 一卽一切。一切卽一。心境兩忘。何有煩惱濁之事。
 道個法身。一體尚落分疏。何有衆生濁之類。青青
 翠竹。總是真如。鬱鬱黃花。無非般若。何有見濁之
 相。不見有我人衆。生壽相之體。前後際斷。何有命
 濁之生死。其或不然。更聽說偈。至體元無死與生。
 人生生死妄流行。當人直下能知本。依舊靈源一
 泊清。問曰。如何是生死妄流行。師曰。不悟至理本
 寂。曰。悟得至理本寂時。如何。師曰。半夜松稍月寒。
 潭是對談。曰。此莫便是學人棲心處也。無師曰。蠟

篆求文義時人何太愚曰。如何是超出言象一句。
師曰更聽說偈。壁上兩三行蠟篆。何人見處不分明。於中但問是何義。打失禪家正眼睛。

舍利弗若我弟子至非辟支佛

此兩行經諸佛大聖人出見於世的本懷。只是欲要顯示人人本具圓滿覺性。如何謂之圓滿覺性。諸佛悟之謂之聖人。衆生迷之謂之凡夫。凡夫與聖人同一覺性。諸佛大聖人觀一切衆生皆此覺性而不自知。故生大憐愍演此法華妙經。意欲人人皆悟此圓滿覺性。能悟此圓滿覺性方名佛。

弟子以名弟子。所得之道乃傳佛之道也。既稱佛之弟子。曰聲聞辟支。而不明本具圓滿覺性。是虛名弟子也。菩薩乃道學人也。諸佛出世。但教化道學之人。既爲羅漢辟支證果之人。當進學大學。方是學道人。而更不識菩薩所修行業。是爲大謬。夫菩薩所修行業。不著一切相。不離一切相。念念純真。行行正等者也。行行正等。必至佛之無上正等。念念純真。必至佛之圓滿純真。既到圓滿純真。無上正等田地。則當自信真如界內。絕生佛之假名。平等性中。無自他之影相。舉如意云會麼。若於此。

會得。自覺無一法不是佛法。九流百氏徒立名模。無一事不是佛事。三界六道空生欣厭。綿州附子漢州薑。三周妙法。南山起雲。北山雨。七卷玄談。其或不然。更聽說偈。宇宙中間理本同。不須同處別渠儂。青山幾片白雲繞。已爲諸人論色空。問曰。如何理本同處。師曰。著衣喫飯。曰。恁麼。則人人是佛。不須疑。師曰。只怕生疑。曰。生疑時如何。師曰。你衣我飯分千種。論是論非有萬端。曰。不生疑時如何。師曰。截瓊枝寸寸是玉折栴檀片片皆香。曰。直捷一句作麼生道。師曰。若要直捷。請各無事。

又舍利弗。至若不信此法無有是處。

此一段經。溫陵環師科爲揀邪。勸信謂揀去邪妄。狹小之心。勸信大乘成一佛知見也。講論大畧。如此山塹。不敏試再以佛知見三字拈一遍看。經云。若不信此法無有是處。此法卽佛知見也。夫佛知見者。卽十方三世一切諸佛大聖人之知大聖人之見也。蓋世人之知見。有我人衆生壽者之差。有上下四圍之別。以有此差別故順我者則喜逆我者則怒。人不如我則生哀我勝於人則生樂。以有如此百千萬億惡知惡見。故名下愚。或名不超脫。

或名苦衆生。或名不如意。大聖人之知。知一切萬法皆一。皆真無始終。無向背之圓覺也。大聖人之見。見一切種種諸物。卽一心。卽一性。無彼此。無分別。之純真也。以有此百千萬億純善之知見。故名上智。名正等覺。或名世尊。或名大解脫舉如意云會麼。若於此會得。天地同根。萬物一體。諸佛衆生如水底月痕。地獄天堂似空中鳥跡。其或不然。更須向靜室中自看。我此六尺之身。乃父母所生之身。長者不過百年而已。過此百年後。此身必同泥土草木。旣同草木泥土。當知今日之能知覺者。今

日之能談論者。畢竟在甚麼處安立。或再不悟。再看此身未生已前。元宋唐漢之際。乃至五帝三皇之上。今日之知覺。畢竟從甚麼處得來。於此看處。忽爾頓悟。當自覺知太極我也。我太極也。前後際斷。上下界空。說個法身。打成兩橛。道個一體。已入分疏。更聽說偈。知饑知飽。真如性。不屬六根。并六塵。直下頓能參得透。從茲生死不相因。問曰。如何是知饑知飽。真如性。師曰。你問者便是。曰。既是人人具足。物物全真。衆生諸佛爲什麼聖凡不等。師曰。因他不見性。曰。見性時如何。師曰。你也無問。

我也無說。

除佛滅後至便得決了

佛未出世此法華經隱於天地萬物。佛既出世此法華經顯於佛口。佛既去世久矣。此法華經便是佛口親傳。若不見此法華經。即是不聞佛語者也。若不見此法華經。即是不見佛相好者也。故曰除佛滅後見前無佛此經乃佛也能持此經解此經。即是見佛聞法。以此經即如來前身。即諸佛慧命也。舉如意云會麼。若於此會得靈山一會。儼然未散。釋迦世尊共多寶佛在寶塔中正談妙經。天雨

四花。馥郁柔軟地搖六震。畏虔敬仰我等親受記勗。不待當來法界同成正覺。豈容他日其或不然須向靜室中焚香獨坐。看個不思善不思惡正恁麼時。那個是自己本來面目。如是久久工夫打成一片。必當自悟我心之念。念因境生。諸境紛紜。還因心覺。心境之外。靈心本正。心寂念滅之時。是名寂滅。此寂滅體。卽諸佛之心宗。諸祖之法要。更何疑哉。或更躊躇聽說山偈。靈山一會儼然時。妙法何人是受持。我許趙州云栢子。清光千古照離微。問曰。學人不會。再請說偈。此經即是此心妙心妙。

蓮經遍十方。普請諸公俱著眼。塵塵諸佛放毫光。曰既是塵塵有佛放光。爲什麼人不能見。師曰。不是不見。人不願見。曰願見時如何。師曰。再聽說偈。肯思見佛修諸善。思見三途惡百端。有個道人俱不見。蓮華遍界不相瞞。曰學人愚拙。望師直指。師曰。若要直指。守戒念佛。曰和尚幸是禪宗。爲什麼枷鎖自累。師曰。你不怕枷鎖破戒妄想。曰中道一句乞師指示。師曰。且守念佛看。

舍利弗汝等當一心^至唯一佛乘。
四維上下曰宇。古往今來曰宙。宇宙中間一理而

已。理一則性一。性一則所謂一佛乘一佛知見。
覺體無有不一者也。今吾佛大聖人宣示此一佛乘。一佛知見。一覺體。要當信受。若不信受是自昧已靈者也。又吾佛大聖人於一切法上無不知其根蒂。無有不知其最初。無有不知其終窮。如是乃至死此生彼前因今果。名字相狀。國土鄉井。變化情思。無有不窮其諦實也。故其語無虛妄。我等當諦信受持。若不諦信受持。是自欺其心。自失其大利也。舉如意云會麼。若於此會得。如目視杲日。似耳聽轟雷。其或不然。須向六和堂內。一念萬年。萬

年一念。工夫純熟。打成一片。則當自知如饑欲食。
不必更問他人。饑與不饑可食不可食者也。故諸
佛出世。諸祖闡揚。無不爲此一法。更無他法。諸三
乘人。不知此一乘道者。過在於何。在於不知一也。
以不知一。故雖不造惡業。終是我相未忘。分別之
念不息。以不能忘我。并分別念。故憎愛取舍之根。
不能淨盡無餘也。咦。聽說山偈。萬象紛紜。本有根。
如來指出。感深恩。衆人不信。是自昧劫石難消苦。
未伸。更聽一偈。吾師示我我之心。諦信從茲不外
尋。旣不外尋。歸自己。純然觸目是黃金。問曰。經云。

受持佛語。如何是佛語。師曰。今日講的是法華經。
曰。恁麼。則人人皆聽受。個個莫生疑。師曰。一道孤
光。寒潭萬丈。曰學人不會。再聽直示一句。師曰。若
要山埜直示。今日講的是法華。

爾時世尊欲重宣此義。而說偈言。至故爲說大乘。
此十四句偈。重頌法華。會上退席之衆。言其俱是
糟糠不實。無福之人。再舉此衆無枝葉。至舍利弗
善聽。此三句頌。世尊自喜。五千退席。無有枝葉。唯
是真實。可當善聽。再舉諸佛所得法。此一句直指
妙法全體也。再舉無量方便力。至優婆提舍經。此

十六句頌諸佛出世。皆權設方便。三乘種種法門。隨衆生情。非實法也。再舉鈍根樂小法。至以故說是經。此十八句偈。頌一佛乘。一佛知見爲本。其餘九部皆方便權設也。再舉有佛子心至故爲說。大乘。此十四句頌。說法華妙經之由。蓋法華妙經卽人人本具。妙性。以此妙性不明。被種種情欲所累。情欲既累。妙性愈隱。故吾佛大聖人出見於世。雖種種方便開示。主意爲顯。此人人本具之妙性也。如何謂之妙性。妙性卽人人本心之理。以此人人本心之理。大而無外。細而無內。前而無始。後而無終。豎第三際。橫遍十方者也。舉如意云會。若於此會得。大乘小乘。空中鳥跡。佛法世法。水底月痕。盡虛空界。是箇自己。卽自己性。是個法界。水投水而無異。空合空乃一般。到此田地。且道還有佛可說法麼。嘆聽說山偈。打破虛空。卽本眞頭頭。物物是全身。當人更欲求方便。依舊蓮華紙上塵。問曰。如何是非紙上的蓮經。師曰。有耳不能聽。有口不能談。曰。恁麼則今日講演。俱是妄語。師曰。也妄也不妄。曰。妄卽如何。師曰。一切有爲俱屬生滅。曰。不妄時如何。師曰。一切有爲俱是實相。

聲聞若菩薩至皆成佛無疑

此四句偈頌大道之相。無相可相。大道之名。無名可名。以無名可名故。雖曰圓覺。曰法身。曰太極。曰佛性。曰上天。皆紙上之畫。口中之言。大道至理。終不能彷彿於萬一也。以無相可相故。雖三十二大。人相。八十種隨形好。乃至三千威儀之進退。八萬細行之出處。皆有生滅。有去來。有成壞。有取舍之迹。大道全體。亦終不能形狀於萬一也。大哉大道。豈容易領悟乎。由是吾佛大聖人生大憐愍。直指大道全體。卽人人本具妙性。演此妙性之理。曰妙。

法喻此妙法曰蓮華。以本具妙性大而無外。細而無內。色空無間隔也。前而無始後而無終。古今無間隔也。以空色無間隔。故仰觀俯察。遠視近思。無有不是自己妙性至體也。以古今無間隔。故威音那畔更那畔。彌勒後來更後來。無不是自己刹那真際也。三乘向外馳求。故轉求轉遠。一乘直指自己無疑其或不然。更聽說偈。自家一個古毘盧。不悟還應是自疎。直下頓能親會得。此經闡演亦成迂問曰。如何是古毘盧。師曰描不成。畫不就。曰描

不成畫不就畢竟是什麼物。師曰。我欲安名。恐人錯認。曰。恁麼則無名無相真如性。有說有思。大道塵。師曰。更聽說偈。無名無相真如性。有說有思。大道塵個裏不須分黑白。曾來大道絕親疎。問曰。恁麼則大道全體。鶻突一片。師曰。只怕不肯鶻突。肯鶻突。道理自明。曰。如是則識得一萬事畢去。師曰。善哉丈夫。

十方佛土中至來世得作佛

此七句偈。頌諸佛出世唯說一乘。再舉諸佛出於世至濟度於衆生。此五句頌言諸佛出世本懷。再

舉佛自住大乘至皆令人佛道。此二十八句。頌大聖人之心平等至仁。普欲人人同悟。無揀擇也。再舉若我遇衆生。至迷惑不受教。此四句。頌衆人見小。佛不便說大乘也。再舉我知此衆生。至是亦非真滅。此三十句。頌衆人見小不堪受教。佛乃方便說變粗形爲細質。易短壽作長年之涅槃小果也。再舉諸法從本來至來世得作佛。此四句。頌萬法本寂。但人自鬧耳。蓋人人本具實相妙體。卽易所謂太極。本教所謂圓覺也。知此則名爲知道行。此則名爲行道。証此則名爲證道。不知此則不足謂

之知道不行此不證此俱不名爲行道證道者也。何以如此。蓋此實相妙道。著實而無虛妄之神妙道理也。此理卽人人本具之天理也。既知此道成佛無疑。故行此道來世作佛也。舉如意云會麼。若於此會得。十方不隔。三世融通。無一名不是此道之名。無一物不是此道之物。其或不然。須向蒲團上默坐自看。看箇萬法歸一。一歸何處。公案久久工夫純熟。打成一片。方自信道真如界內。絕生佛之假名。平等性中。無自他之形象。如更躡躅聽說山偈。自家一個古彌陀。聲色頭邊蹉過多。我佛與

人親指出光明。從此照娑婆。問曰。如何是古彌陀。師曰。能問者便是。曰古人謂道語忌十成意旨如何。師曰。大道本無忌。曰恁麼則今日知覺卽是古佛全體。師曰。更消細問。曰學人便如是承當。只恐認賊爲子。師曰。你有幾個能問底心。曰只一個。師曰。你又道認賊爲子。曰。如是則木人半夜穿韓石女天明戴帽。師曰。唵嘛呢叭彌吽。

我有方便力。至皆已成佛道。

此八句頌諸佛出世。雖有多種教誨。主意爲一。佛乘而設也。再舉過去無數劫。至令入於佛道。此十

二句。頌過去大聖人之道無有不同證同知。人人本具之理性亦無不同證同知者也。再舉又諸大聖王_經助顯第一義。此六句。頌諸佛知衆生有種種好樂。故設種種教法。實則一佛乘也。再舉若有衆生類_至皆已成佛道。此八句。頌往古聽法華之人。以聽法華經故。悟得本具妙性。暨窮三際橫遍十方。以悟自性廣大圓滿故。卽知自己與十方諸佛同一妙心也。以同一妙心故。凡修布施持戒等行。皆妙行也。以修如是妙行爲因。今皆成佛。乃必然之理也。蓋因該果海。果徹因源。因果雖遼。性體

則一。相才雖不敏。悟亦有宗。試再以性之一字拈一遍看。蓋性之一言。在諸佛大聖人闡教度人之地。謂之道。在天地萬物紛紜變化各有一定之理。謂之理。在各人自認爲我之心。謂之情。在各人克我以順衆人之性。謂之善。在各人爲已以作害人害物之業。謂之惡。大聖人於此善惡兩途。方便勸化。譬喻曲引。令其從善。謂之經典。一切人不信。念造惡。失自本性。謂之闡提。闡提卽無信人也。如是種種千門萬戶。教化名字。皆爲一個性字。不明。有如是說也。性若明。佛也不須出世。祖也不必西

來舉如意云會麼。若於此會得。便見十方不隔。三世道同。揚眉掉臂妙蓮經聲。若轟雷咳嗽。擡頭無上道相。如杲日。其或不然。更聽說偈。著衣喫飯人。人會。何故自家性不明。自性但明。皆是佛。明心不必聽蓮經。問曰。如何是性明一句。師曰。諸惡莫作。衆善奉行。曰。如是。則作善名爲見性。作惡名爲不見性。師曰。靜中自思。自性是欲樂邪。欲苦邪。曰。自性欲樂。師曰。既自性欲樂。不得教他受苦。曰。怎麼。則率性是道。師曰。車不橫推。理不曲斷。諸佛滅度已。至皆已成佛道。

此十八句頌。諸佛闡教。莫不明此妙性心。旣明此妙性心。則所行之行。皆妙行也。所行。皆妙行故。大而六度四諦。萬善微而戲笑合掌。一皆成佛妙行也。何以如此。蓋人人本具妙心。圓裹三世。融徹十方。一卽一切。一切卽一者也。以不悟此妙心。故流轉六道。往返無窮。從迷至迷。古今不已。今法華妙經。諸佛之心宗。千經之管轄。一心之元鑑。實相之妙門。旣而得聞心乃妙心。性乃妙性。行乃妙行也。以行皆妙行。故行卽真如。性乃妙性。故當體是佛。心卽妙心。故計較思量。十度皆般若妙經。到此田

地鳶飛魚躍與四十九年演教無殊舉手低頭共三百餘會談經不異更何佛道而不成更何衆生而不度其或不然須向靜中看個父母未生以前畢竟是何面目忽然頓悟方知得山河及大地全露法王身其或更有思量可聽山僧說偈頓悟妙心心卽佛不須修習不須成低頭合掌已成佛也是隨他換眼睛問曰如何是卽心是佛之妙師曰闍黎是佛不可生疑曰學人不疑爲什麼不得成佛師曰爲闍黎不成佛正是疑處曰恁麼則萬緣消盡一性圓明師曰更聽說偈本來成佛不須疑

不信分明是自欺只若不疑并篤信白毫光照五須彌曰本來成佛還假莊嚴也無師曰更聽山偈一道寒光照碧空非莊嚴處妙嚴重此時更問莊嚴事眼不盲兮耳不聾

未來諸世尊至亦同得此道

此十四句偈頌未來無量大聖人道同以道同故設法教化度人無有不同者也所以同者何蓋此道在天地萬物均謂之理以均得此理故經萬萬世無窮天地萬物還是今日一般無少易也此道在人均謂之性以均得是性故雖死此生彼生此

死彼經萬萬世無窮。亦還是今日一般無少謬也。此道在於本土堯舜周孔謂之中和明德。人人能致中和圓明德。則無有不是堯舜周孔也。此道在於吾佛大聖人。謂之妙法。故若有聞法者。無一不能成佛。其或不然。請聽山偈。人人本具真如性。千聖曾來只一般。於此一般真領悟。千差萬別不能瞞。問曰。如何是無漏智。師曰。你卽今漏在那邊。曰中道亦不住。師曰。中道旣不住。你漏我不知。曰頓悟妙法。則無所不知。爲什麼學人漏處不知。師曰。更聽說偈。無漏難思智甚深。宜於靜處自追尋。忽然

追到無追處。萬古元來只個心。

至其實爲一乘

未來世諸佛

此四句偈。頌往古諸佛如此。現在諸佛如此。未來諸佛亦如此。皆如此者。何以人人均具此性。旣均具此性。則均具此心。此性此心旣同。則諸大聖人出世闡化亦無有不同者也。諸大聖人闡化事迹旣同。則大聖人主意爲一大事。亦無不同。相才疎學淺。悟亦有宗。不避煩引之議。試再以一大事拈一遍看。夫一大事只是個性字。蓋性之一體。無有形相。難以言說。在知覺處。喚作心念。在塵境處。喚

作事務。在開示處。喚作教典。在逆人之性處。喚作惡業。在順人之性處。喚作善行。在死生交接之際。不悟。喚作憂苦。悟徹。喚作自在。在憎愛取舍之時。不悟。喚作牽纏。悟徹。喚作解脫。在萬有紛紜境上。悟徹。喚作一法身。一佛知見。一佛乘。不悟。則喚作四生業網。三界火宅。六道塵勞門。如是乃至千差萬別。苦樂升沉。無不在此性之所而易其名也。諸佛大聖人。獨先自知此性之全體。故謂之一大事。愍人之不悟。故開示令人悟入。謂之佛知見。大學格物。格此也。中庸率性。率此也。諸佛圓證。證此也。

衆人自迷。迷此也。以迷此故。六道往返。自苦自樂。無有了期。以証此故。三界自在。無是無非。有何窮極。舉如意云。會麼。若於此會得。萬物一馬也。何真何假。天地一指也。孰是孰非。其或不然。聽說山偈。樂哀逆順。中於覺。迥脫根塵。曰妙心。會得了。然爲大事。圓通自在。號觀音。問曰。如何是一乘。師曰。你卽今有幾個乘。曰覓個一亦不可得。師曰。你適來又問。如何是一乘。曰恁麼。則十方薄伽梵。一路涅槃門。師曰。見性之人。無此情解。曰。如是。則但離妄緣。卽如如佛。師曰。離妄二字。費力不少。曰。如何是

省力一句。速道。師曰。山僧今日講似勞碌。

諸佛兩足尊。至導師方便說

此八句重頌佛說一乘之本意也。蓋諸法無自性。能顯示全體全用之妙也。以諸佛大聖人不欲斷此佛種。宣示一乘。雖欲說一乘。不能直道。故以種種方便而宣示之。夫一乘者。卽人人自性之全體。全用。無二法也。舉如意云會。若於此會得森羅萬象。自性堂堂。大地山河。真常密密。觸事而真。擬心皆佛。更何疑哉。其或不然。須向靜中回光返照。

與蒲團打合。看個一歸何處話頭。看來看去。若道一有所歸。卽成二法。若道一無所歸。一從何起。如是工夫。久久忽然頓悟。方信道我之妙性。本與十方諸佛歷代祖師無少間隔也。但以自昧。以自昧故。於此本同體上起人我見。生順逆心。以有人我見故。逆順之心不可窮極。以有逆順心故。人我之相不可窮極。嗚呼。欲還一佛乘。何可得也。故佛於衆人中。獨先覺此妙性。大而無外。細而無內。前而無始。後而無終。豎窮三際。橫遍十方者也。舉如意云會。若更疑惑。聽說山偈。自家性必自家知。何

事求之曰未歸。既曰聰明英俊士。當於此處莫遲疑。問曰。既是自家性必自家知。何以古人三登投子。九上洞山。方明此事。師曰。三登投子。九上洞山。正是騎牛覓牛。曰恁麼。則咳嗽掉臂。無不是西來的意也。師曰。古人道無量劫來生死本。痴人喚作本來人。正是你等。曰。迦脫根塵。不拘文字。請師道一句。師曰。道卽道一句。只恐你落在根塵文字。曰。落在根塵時如何。曰。道馬是馬。言牛是牛。曰。不落根塵如何。師曰。道馬元非馬。言牛未是牛。曰。學人轉問轉生疑。請師直捷道一句。師曰。洞山麻三斤。

趙州柏樹子。再莫生疑。

子貢高臺問曰。請師道一句。師曰。洞山麻三斤。

天人所供養。至皆令得歡喜。

子貢高臺問曰。請師道一句。師曰。洞山麻三斤。

此二十六句。重頌現在十方佛與釋迦佛說法。皆以方便發明個性字。性卽佛乘。相才荒學淺悟亦有宗。試再以佛性拈一遍看。夫性者。卽各各自心之理。此理至公至平。至明至大。至一至圓。所以有不公不平。不明不大。不一不圓者。非性不圓。不大不明。不公不平。乃各各自私自偏。因於六根縛於六塵。拘於六識。所以不能至公而無偏私。至平而無高下。至明而無蒙昧。至大而無狹小。至一

而無雜亂。至圓而無欠缺者也。吾佛大聖人出現與十方殊國大聖人出現俱最先覺悟。闡揚教法雖教法有種種不同。所以顯示此性之全體妙用。則無不同也。舉如意云會麼。若於此會得。卽自己性與十方大聖人性似水投水。卽十方大聖人性與自己性如空合空。大千界總是黃金微塵國。通爲白玉徹上徹下光明炯炯。卽理卽事正等圓圓。到此田地說甚麼了與不了。悟與不悟。其或不然。聽說山偈。乾坤萬物性通該。性一休癡向外猜。我許一歸何處答。青州衫子價高擡。問曰。青州衫子

價高擡。學人通不會。師曰。難得個不會。價值千金。曰。價值千金是甚麼物。師曰。不是頭上帽。亦非脚下鞋。曰。畢竟是什麼物。師曰。我怕你不信不敢說。曰。和尚誠言焉敢不信。師曰。既能諦信。決定是你。曰。甚麼。則人人有一面古鏡照天照地。師曰。切忌安名。曰。安名時如何。師曰。四聖六凡空裡花。終是不實。曰。不安名時如何。師曰。三身四智性中體。萬古圓融。

舍利弗當知。至而起大悲心。長滅不同人鬼。劍藏此十六句頌。科家謂之原始開權。謂佛始初成道。

觀衆人機見狹小。無有福慧。乃漸漸引誘。至於一
舍乘之意。蓋六道衆生雖若升沉不同。入生死險道
則同也。何以謂之險道。以人人本具妙性。圓累十
方。融貫三際。無死此生彼之殊。無苦我樂他之別。
以不悟此性故。妄執我見。固守夢形。從苦入苦。從
冥入冥。卒無自了之期。故謂之險道。吾佛大聖人
乃起大慈悲心。以種種因種種緣。開其正眼。曰莫
認此身。此身不久。莫貪此樂。此樂苦。因百年如水
上浮沤。六境若雲中掣電。當認法身。法身乃自性
之本身也。無死生之變。無苦樂之更。圓常湛寂。明

妙冲虛者也。舉如意云會麼。若於此會得。十方不
隔。三際融通。自絕孽牛愛尾之弊。自空子蛾投火
之愚。大而無外。共十方諸佛。一口宣揚。細而無內。
同歷代祖師。一心湛寂。其或不然。須向靜中自看。
此身四緣假合。散開則元無自性。此心六塵假靈。
消滅則元無自體。如是返復籌度。畢竟那個是我。
不生不滅。常住本來面目。如是久久工夫做到。自
有到家時節。喎。更聽說偈。萬有紛紜各自身。爲無
佛眼。各分神。肯能直下知根蒂。生死何常見屈伸。
問曰。如何是無佛眼。師曰。見有千差萬別。曰有佛

眼時如何。師曰。等閑識得東風面。萬紫千紅總是春。曰。恁麼則諸佛見一種衆生見兩般。師曰。真具佛眼。一種也是。兩般也是。曰。如何是了了不疑一句。師舉如意云見麼。

我始坐道場至法僧差別名。

此十句。頌佛既得道已。思衆人愚迷。如何可度之意。再舉爾時諸梵王至請我轉法輪。此八句。頌諸天仙衆。請佛轉法輪之意。再舉我卽自思惟至疾入於涅槃。此八句。頌若說妙法。人必不信。不如不說之意。再舉尋念過去佛至但爲教菩薩。此二十

二句。頌十方佛勸佛欲化衆生。當方便演說三乘之意。再舉舍利弗當知至法僧差別名。此十八句。頌吾佛大聖人開權顯實之意。試再以權實二法細拈一遍看。夫權者。權變以能反常合道。故名權變。如至體無生死而身自生死。乃權教之曰。此身不久。命光遷謝。當究不生不死圓常之體。如至理湛寂本無是非。而世事紛緜。却有是非。乃權教之曰。一切有爲之事。終歸空寂。當究無是無非廣大之妙。如是乃至其小者教其令大。至鄙者教其令高。其狹者教其令廣。其苦者教其令樂。皆名權也。

實者實乘。以能真如無妄故名實乘。如人人本具妙性。歷萬世而不遷。王萬象而不別。冲虛妙粹。炳煥靈明。無去無來。不生不滅。非大非小。乃一乃萬。不可以智知。不可以識識。諸佛大聖人證此謂之正等。萬古大聖人持此謂之中庸。衆人迷此謂之生死海。知明識此謂之淨法身。舉如意云。山僧也不知此。也不識此。也不迷此。也不證此。且道喚作什麼。嘵聽說山偈。自家心性自家知。何必如來著力提。著力既提。提醒後。大千無處不光輝。問曰。如何是自家心性。師豎拂子云。會麼。曰。恁麼則觸事

而真。不須擬議。師曰。天際日上月下。檻前山深水寒。曰。學人不會。師曰。用會作麼。曰。如是則拈來無不是。用處不生疑。師曰。你還記得話頭麼。僧禮拜云。蒙受記。

從久遠劫來_至悉亦當作佛

此四句頌。總結方便開權之意。再舉舍利弗當知。至今正是其時。此十二句頌說法日久。衆人心純。將說妙法。顯此妙性之意。再舉舍利弗當知。_至但

說無上道。此八句頌。福薄智小者不信此經。此人既退。當正直說之意。菩薩聞是法。_至悉亦當作佛。

此四句頌既遇如來正修行路。根無大小。皆成佛果之意。相才雖不敏悟亦有宗試再以悉亦當作佛一句重拈一遍看。夫妙道大體。卽人人本具妙心。此心不屬有知。不屬無知。不屬有相。不屬無相。五蘊四大假立空花。三身十力。妄號十體。到此田地。求個生死大似水底月痕。問云。人我還如空中鳥跡。舉如意云。會麼。若於此會得。日月燈明佛是自己圓成妙法蓮華經。元非聽聞他語。其或不然。須是向蒲團上屏息諸緣。單單提個那個是父母。未生以前本來面目。參來參去。自有大悟。到大悟。

時鳥啼花笑也是本來面目。山青水綠也是妙法蓮華經。還知此意麼。喚。太湖三萬六千頃。月在波心說向誰。問曰。經云悉亦當作佛。且道今日聽法有幾人成佛。師曰。不聽者不成。曰。學人亦聽。爲什麼不成。佛師曰。爲你信不及。曰。信得及時如何。師曰。無明實性卽佛性。幻化空身卽法身。曰。恁麼。則本自圓成。自生疑惑也。師曰。如是則我不敢輕於汝等。汝等皆當作佛。或云去後復有大師故不一也如三世諸佛。至說無分別法。或云去後復有大師故不一也

性理一故道理亦一。以道理一故。東方聖人。南方聖人。西方聖人。北方聖人。所談之道。則無不一也。以四方道同故。乃至過去萬萬古之前。道亦是一。以過去道同故。乃至現在至未來萬萬世之後。道亦是一。以三世道同故。吾佛大聖人所談之道。亦無不同。故云說無分別法。舉如意云。會麼。若於此會得圓陀陀地。自不分兔角之短長。平坦坦中。自息辨空花之濃淡。鳶飛魚躍全影色身而法身。竹翠花黃全露無極而太極。其或夫委須把世緣妄緣。拋向那邊更那邊。再以聖念凡念頓息令絕。更

令絕。直得心如牆壁。身若虛空。到恁麼田地。單單念句阿彌陀佛。此念佛之外。更無別念。除此念佛之心。更無別心。如是久久。工夫成片。道自無間。理亦自一。理既一。故則當自悟真如界內。絕生佛之假名。不是虛語。平等性中。無自他之影相。不是空談。從此向去。麻三斤柏樹子。廬陵米。趙州茶。信手拈來。信口道出。一一暉天鑑地。一一耀古騰今。喫更聽山偈。人人具足真如性。法界何嘗間自他。自是當人私執着。累吾黃面老爺爺。累吾黃面老爺爺。方便門前說有車。普請今朝同著脚。勿教生死。

又來花。莫教生死。又來花。念句彌陀。掃蕩他。掃得
盡時。生死盡。十方何處不蓮花。問曰。如何是何處。
不蓮花。師曰。處處彌陀佛。家家觀世音。曰。恁麼則
十方不隔。三世道同。師曰。何消附會。曰。不附會時
如何。師曰。大海從魚躍。長空任鳥飛。

諸佛興出世。至過於優曇花。

此十八句。頌佛之大法難聞也。既聞信之亦難。以
天地成立以來。不知經幾年歲。有一佛出世。如本
土以十二萬九千六百年爲一元。則過七萬五千
餘歲。纔有佛之聲教。佛則未聞有也。故曰諸佛興

出世。懸遠值遇難。又如佛出世四十二年之後。始
說法華。故曰正使出於世。說是法復難。又如山僧
以輪迴因果。乘之前而莫知其始。以未聞此之妙
法。故尚存凡地。今乃得遇得聽。乃至講說此經。此
經豈容易聽聞講說乎。故曰無量無數劫。聞是法
亦難。能聽是法者。斯人亦復難。舉如意云。會麼。若
於此會得。十方諸佛一齊出現。演大法輪。歷代祖
師一齊悟道。傳授心法。融古今於一念。物物皆清
淨妙身。會利海於毫端。事事卽真。如實際其或不
然。請向靜室中。焚香默坐。看個萬法歸一公案。久

久工夫打成一片。當自覺知虛空無面目不用巧
粧眉。本自圓成無欠少也。如更躊躇聽說山偈妙
道。何曾離自心。心心不用外邊尋。回光直下知端
的。瞬目揚眉總妙音。問曰。如何是打成一片。師曰
絕喜怒哀樂無意必固我。曰恁麼則但離妄緣卽
如如佛。師曰。如煎礦法。雜石旣去。金乃自精。曰學
人從此一志念佛時如何。師曰。如世優曇花。人間
真少有。曰多見念佛人臨終無下落時如何。師曰
旣無下落。還不曾念佛。曰請省力處道一句看。師
曰但念阿彌陀佛。

汝等勿有疑。至無聲聞弟子。
此六句經正頌天下無二道。聖人無兩心也。蓋天
地同根萬物一體。以天地同根萬物一體故。更不
須疑十方大聖人有兩樣心。更不須疑往古來今
大聖人有兩樣道。道卽法也。又云一乘經云無聲
聞弟子者何。蓋聲聞聞聲領悟道似在他得道旣
在他得。則有授者得者。以有得授故。我人之界聳
然旣有我人之界。大道全體於是乎大謬矣。更說
什麼大道一乘。故云無聲聞弟子。舉如意云會麼。
若於此會得。仰觀俯察。溥博淵泉遠取近思。於穆

不已遍十方是箇大光明藏若夾路桃花風雨後
 馬蹄無處避殘紅極三際是個安養世界若等閑
 識得東風面萬紫千紅總是春其或未委還須與
 蒲團打合冷坐一二十年孜孜以斯道爲急務單
 單看個父母未生前本來面目工夫做熟忽地打
 開千聖纂籥當自知得佛一我也我一佛也萬物
 一我也我一萬物也更何疑哉聽說山偈宇宙中
 間一理通何須一外別青紅流分萬派眼皆見鳥
 嘸千般耳豈聾米價大家親領得酒錢未必我雷
 同試將此道眉掀看魚躍鳶飛俯仰中問曰如何

是魚躍鳶飛師曰上下昭著表裡洞徹曰恁麼則
 道無時而不在道無處而不然師曰曾來千聖悉
 同途曰學人便如是會得肯如何師曰早知燈是
 火飯熟已多時

汝等舍利弗至廣讚一乘道

此十六句科家謂之流通法說謂當廣讚一乘妙
 法破五濁之痴迷也以五濁惡世人皆著於世欲
 終不自悟而求自性之真道也自性真道卽一佛
 乘又謂之佛知見蓋此妙性人人本具個個圓成
 但以不能克去我執之私所以終被我相之所籠

法華大意中

罩。故與大道全體漸遠。橫生妄見。亂起邪思。以有如此惡覺。故三界之苦惱熾然。四相之奔波競起。欲復自性之真。何可得乎。吾佛大聖人。以法界爲自性。以萬有爲自身。出現於世。雖說三乘。權開方便。然終爲一佛乘而說也。舉如意云會麼。若於此會得。求個一之實體。尚不可得。說什麼四濁五濁。求個一之實乘。亦不可得。論什麼二乘三乘。其或未然。更須放下。更放下。掃蕩更掃蕩。專專舉個無滋味話頭。工夫做熟。必當有悟。夢裡明。有六趣覺後。空空無大千。到斯田地。說個三界水底月痕。說

個四相。空中鳥跡。喚聽說山偈。頓悟真如實相。門門本不立牆藩。是非窩裡蓮花綻。凡聖場中正覺純。幾處笛聲驚世夢。一窓月色見天根。許誰於此同肝膽。謾唱山謌擊瓦盆。問曰。如何是擊瓦盆之義。師曰。隨流認得性。無喜亦無憂。曰。恁麼。則不思而得。不勉而中。師曰。始是道人行履。曰。學人便如此行。將去時。如何。師曰。不爲分外。

舍利弗當知。至自知當作佛。

此十二句頌。言十方三世一切諸佛。最初皆以種種因緣。種種譬喻。開示人人本具之妙性。末後皆

各各領悟。各各証入。圓滿人人本具之妙性者也。佛旣開示人旣悟入。則本具之妙性自覺。前前無始。後後無終。大大無外。細細無內。以如是故。愈覺生死如天上雲生而天本淨。愈覺苦樂如鏡中像現而鏡本明。到此田地。四生夢幻。三界空花。聞復翳除。塵消覺淨。衆生界盡煩惱事空。成佛多時。度人已畢。更何疑哉。舉如意云會麼。法說一周。今日了。譬喻明日又重宣。兩重公案直參透。頭上何人不是天。問曰。法說一周。今日旣畢。頓成佛道。却有幾人。師曰。只你一個不成。曰。恁麼則學人不成。師

曰。不是不成。只是不肯成。曰。肯成時如何。師曰。一拳拳倒黃鶴樓。一踢踢翻鸚鵡洲。有意氣時添意氣。不風流處也風流。曰。不肯成時如何。師曰。今日復明日。明日何其多。少壯不努力。老大將如何。曰。吾師答語何太逼切。師曰。勸君更盡一盃酒。西出陽關無故人。曰。恁麼。則聞此法者便當成佛。師曰。聽說山偈百年。何苦百年瞞。百歲渾如夢。裡觀夢裡百般知是妄。便當今日把心寬。曰。直下成佛。一句再乞師指示。師曰。更聽說偈。乾坤大道本圓成。水自綠來山自青。更欲向人尋究竟。信知無雨是。

1 2 3 4 5 6 7 8 9 10 1 2 3 4 5 6 7 8 9 10 1 2 3 4 5 6 7 8 9 10

天晴。

譬喻品第三
普示輪日更顯無間時大士本圓成

此一品名譬喻者。以上根利器。皆於法說一周。已得開悟。既得開悟。各謂自性本自圓成。以各謂自性本自圓成。故佛乃授記。授記者。授記於當來我相克盡。必成佛道。欲成佛道。必克我相者。以自性雖本來清淨。因不守自性。流入諸趣。展轉執着。我相愈熾。我相既熾。則所謂本來清淨漸失矣。匪憑大聖人先覺斯道。開大道路。則一切人終無有超出之日。終不能頓悟。自性本自圓成。以大聖人先

覺斯道。重重開示。重重導引。人既領悟。自知作佛。乃記其必得成佛。更何疑哉。然則到此田地。仍復文不曉。卽中下之品。佛乃愍之。故說火宅品。喻以告之。蓋火宅者。大火洞燒之大宅也。三界生死苦。相如之。故取爲喻。某才雖不敏。悟亦有宗。試再以火宅淺小拈一遍看。夫萬物衆多。且置之而弗論。只如爲人在世百年。如朝露。千足若春霜。死之後。縱堆金以爲廣。不過富埋身之具。堆金於我。何益乎。死之後。縱名標鳳閣。更不知名隨形朽。標名於我。何榮乎。所以智者眼空四海。神洞十虛。靜觀彼此。

形骸内外狼籍。非一可取。舉如意云會麼。若於此會得三界上下法。同一本來心。其或不然。山僧有偈。洞然大火正燒時。此處留連實大癡。莫若早逃同快活。免教煎煮父娘皮。問曰。如何是大火正燒時。師曰。清早起來七個字。柴米油鹽醬醋茶。問曰。恁麼則身乃苦本。心乃累元。師曰。誰著你來。曰。大解脫一句乞師舉揚。師曰。誰縛你來。累生痛苦財。又舍利弗驕慢懈怠至亦勿爲說。黃大字品傑思吉。諸佛大聖出見。單單爲一件事。卽人人本來具足圓滿覺性。卽此妙經骨髓。聞此妙經悟此覺性者。

以天地爲自體。以萬物爲自性。以萬物爲自性。故物我一如。如何得有自驕乎。以天地爲自體。故聖凡平等。何有慢他入之不如乎。以聖凡平等。物我一如。故我執自空。如紅爐片雪。何有五欲之深著乎。懈怠既絕。驕慢又無。何有妙經而不能解乎。到此田地。泥團土塊。放大光明。瓠子冬瓜。熾然常說。何有於此而不深領悟乎。舉如意云會麼。若於此會得。步步釋迦出現。頭頭彌勒下生。變大地總是黃金。舉衆人齊成正覺。其或未然。須要掃去胸中蘊積。放下世上紛紜。單單念句阿彌陀佛。初則有念

佛之人後乃人亦卽佛。正當此際。我相除而懈怠。
 空妙心圓而驕慢息。欲覺化爲正覺。凡情轉作聖
 情。更何疑哉。咦。更說山偈。道理精明我相空。相逢
 自不覺疎慵。塵塵五欲塵塵妙。法界何嘗有異同。
 問曰。如何是塵塵五欲塵塵妙。師曰。不到東山久。
 蔔薇幾度花。白雲消散去。明月落誰家。曰。塵塵不
 妙時如何。師曰。蟠涎不滿殼。聊足以自濡。升高不
 知疲。竟作粘壁枯。曰。妙與不妙俱拈一遍。如何是
 超出言象之表一句。師曰。心同虛空界。示等虛空
 法。證得虛空時。無是無非法。

若人不信毀謗至獲罪如是此一百三十句經大畧只是言謗經罪過。夫此經
 者卽人人本具妙心。旣昧此心而不明。是名謗經
 而獲罪。蓋此心者萬形之模範。業者一心之影響。
 三世善惡唯心所造。如器出模。無不相類。如影隨
 形。在處莫逃。故云出乎爾者反乎爾者也。又云自
 作自受。舉如意云會麼。若於此會得。言言開示妙
 法。處處宣揚。妙經存仁存義。而有周召孔顏之稱。
 無瑕無疵而無桀紂秦隋之罵。光輝八荒。名垂千古。
 其或不然。謗斯經者。若說其罪窮劫不盡。咦。聽

法華大意中

卷

說山偈。此心清白妙而圓。纔昧絲毫被業牽。好把此經常對面。免教撞入死生圈。問曰。如何是謗此經。師曰。念念違真性。時時昧自心。曰。如何是讚此經。師曰。孝於家而忠於國。責在己而恕在人。曰。恁麼則諸惡莫作。衆善奉行。師曰。更聽山偈。諸佛衆生共此心。但隨善惡有升沉。肯能念念思修善。釵釧鏹盆總是金。

信解品第四

此一品經。因說譬喻。須菩提。迦旃延。迦葉。目連。四子領悟也。且道。悟個什麼。乃悟人人本具之妙。

性也。何爲妙性。開口欲言。卽成兩個。通不開口。却又遲疑。窮其始。則不見其初。究其終。則不見其後。廣而大之。則不見其外。微而小之。則不見其內。故華嚴諸佛大聖人之見。自凡夫時修行六度。漸積萬德。歷無數劫。乃至成道。闡化度脫衆生。入大涅槃。俱不離剎那際也。剎那際。卽壯士屈伸臂頃。屈伸臂頃。有九百生滅分。剎那乃百生滅分。中半分也。以衆人被形器留礙。旣被形器留礙。則所謂妙性。亦隨之而不妙矣。以不妙故。有生死。有苦樂。有逆順。有善惡。今旣領悟妙性。體如此之廣大。用如

此之妙圓道。如此之神通德。如此之真實。則益知拘於形器之小。或昧於欲樂之癡。甘於業火之燒。久於情波之溺。展轉不覺。爲可憐愍。嗚呼。吾佛大聖人。乃四生慈父。三界大師。不顧至聖之至貴。亦入生死海中。拯濟我等。我等若不信解。是無智人。也是癡狂人也。舉如意云會麼。若於此會得。古今不離於一念。乾坤豈有自他。變大地總是黃金。會萬物皆爲一我。其或不然。更聽說偈。信來卽聖。不須疑不信。還應是自欺。好笑世間癡子輩。強將叔叔喚姨姨。問曰。如何是叔叔喚姨姨。師曰。法身常

住而不認。却認生死夢中身。曰。恁麼則頓悟佛性。乃是丈夫師曰。諸天亦稱頌。何人不讚揚。

信解

再拈

止於至善之地。而無毫髮之疑。所以謂之信。入於大光明藏。而無毫髮之惑。所以謂之解。大哉信解之爲義。苟非窮物理。到知至田地。雖曰信妄信也。不能信之篤也。苟非洞達天機。到真誠田地。雖曰解妄解也。不能解之深也。以不能深解故。凡言論文詞。徒尚華藻。而無實。以不能篤信故。凡動靜云爲。徒假威儀。而無本。信解之義大矣哉。相學雖不

廣悟亦有宗試再以信解詳拈一遍看。蓋自有上天下地以來聖賢間出。闡演教化莫不皆以仁義行其實德。正其名分。欲人人止至善之地而不疑入大光明藏而無惑者也。然則今之聖賢不爲不多。經歷歲月不爲不久。而人尚有不解不信者何。性不明故也。夫性之本體。上而與十方三世大聖人同其根。下而與四生六道衆含靈共其本。外而與山河草木卽其身。內而與皮肉肝肺是其體。人本具物物完成在聖不增在凡不減者也。良以當人自昧。故各各藩籬。物物矛盾。所謂自棄自暴。

性之大體者也。舉如意云會麼。若於此會得。一一天真。一一明妙。其或不然。再聽山偈。人人卽佛。不須疑。不信還應是自欺。一日肯能真克己。衆生何患不菩提。松胞旣曉家家日。梅嶺來春處處時。此理洞然叅得透。鳶飛魚躍大家知。問曰。如何是真克己處。師曰。山僧本愚拙。強做會談師。曰恁麼。則以責人之心。責己以恕己之心。恕人。師曰。自古稱賢哲。無不皆如斯。曰如何是直下成佛一句。師曰。以責人之心。責己。恕己之心。恕人。我等今日。至得無量寶。

此六句頌。乃迦葉旃延須菩提目連四子。自言我等本爲變粗形爲細質易短壽作長年之小學。今日不意皆悟本來成佛。是未曾有之深意。譬如逃逝之子。旣歷年久。不識父面。亦忘家地。一向從他乞覓。受大窮苦。忽入父城。本爲活命。不期是父委付家業。得大富貴。故曰非先所望。而今自得。如彼窮子。得無量寶。舉如意云。會麼。若於此會得。心同虛空界。示等虛空法。證得虛空時。無是無非法。其不然。須向蒲團上。冷坐十年二十年。乃至三十年。默默看個父母。未生前本來面目。工夫純熟。忽

然領悟。應當自知充塞宇宙。無不是妙淨明心。貫徹古今。無不是常住真性。到此田地。山花開似錦。大乘教典。歷歷宣揚。野水湛如藍。鼻祖玄機。明明掀露。更何疑哉。如再躊躇。聽說山偈。但從心外。更馳求。正是騎牛更覓牛。萬水千山增悵望。三冬九夏。討憂愁。旣知幻化非真性。當信金烏卽日頭。若個道人忘得久。江邊扶杖看浮沤。問曰。如何是騎牛去覓牛。師曰。將心求心。卽性問性。曰恁麼。則本自圓成。匪從他得。師曰。一向同則失進修而墮寂。一向別則逐行住以乖真。曰如何是中道一句。乞

師指示。師曰。夢裏明明有六趣。覺後空空無大千。

自西大至南歸天子曰一向何限天無過而聖
半去夏半祐召孫公采公明坐閭母曰汝知頤本
固藝人欲得人首者大父言嘗墮閭城外張良謀
夏禪公卷被取以非義推當計金烏曉日霞春
朝水互長深不復窮平洋水千山帶那皇三表氏
山更何疑告厥再顧懷誰指山野卧翁心後更
大休休此風雲萬古不無常道便此田頭山亦龍吟
燄古今無不妄常道真指便此田頭山亦龍吟

法華大意卷下

廣陵寶城寺沙門無相說

吳興天池沙門法聚 較正

長水平林居士葉祺亂重較

妙法蓮華經第三藥草喻品第五

此一品經大意言諸佛大聖人所談之道是一衆人本其之性是一。但衆人所立之志不同。所領會之意不同。所進修之久近勤怠淺深迷悟亦皆不同。所以證果有小乘中乘大乘之不同也。非佛道有不同人性有不同者也。故迦葉等四子信解之。

後佛乃喻如一雨所霑。一地所產而若草木各各
榮茂。有萬不同。非雨施有不同。地有不同。乃草木
各稟受不同者也。舉如意云會麼。若於此會得。青
翠竹總是真如。鬱鬱黃花無非般若。瞧前草是
自家意思。園中竹卽佛祖玄機。其或不然須向靜
室中與蒲團打合。將三十年工夫專專看個一歸
何處。忽爾桶箍自爆。當大悟云。元來十方大聖人
與自己共箇鼻孔舊矣。若更遲疑。聽說山偈。翠竹
黃花真面目。春風元沒兩般心。既能直下知端的。
葉底枝頭總妙音。問曰。如何是春風元沒兩般心。

師曰。聽說山偈。大包無外。細無內。此理人人不用
猜。我許趙州談祖意。庭前柏樹是西來。曰恁麼則
頭頭上顯物。物上明不須疑也。師曰。更聽山偈。道
體既然充宇宙。目前無法不真如。等閑拈起一莖
草。卽是蓮華七軸書。

復講

唯有如來如實見之。明了無礙。大聖人之心大而
無外。以大而無外故。盡虛空界之國土。風境人物。
巨細升沉。無不見其邊際。了然明白。大聖人之心
細而無內。以細而無內故。盡心性之玄微。奧妙神

聖無不知其念慮。洞然明徹。以盡知念慮故。上而諸佛之性覺下而衆生之性欲。前而往古之劫名始初後而來今之年號終窮。無有不知其精微者也。以盡見其形狀故。大而天地之圓偏廣狹。小而塵芥之起止聚散。無有不見其的實者也。故華嚴楞嚴方廣大集塔諸弟子所問。或世界。或情欲。或半提。或究竟。了無罣礙。故曰如實見之明了無礙。非若拘於一日月所周旋之天地爲究竟。止於一元會所該攝之年歲爲極則。如以一元會所該攝之年歲爲極則須悟此一元會之先却是何時。以

一日月所周旋之天地爲究竟。須悟一日月外果是何境。如此自參。必當自識大聖人之知見。豎窮橫遍。無不到於至處。舉如意云會麼。若於此會得撮塵雖與天地同體。而實小大迥殊。燈燭雖與日月同明。而實廣狹遠遠。其或不然。請聽山偈。上天下地中人物。億萬斯年幾佛生。唯佛人中爲至聖。出言句句盡成經。問曰。如何是句句成經一句。師曰。信則龍女頓成佛。不信善星遭暗墜。曰。恁麼則佛語真實。當奉行而莫違。曰。佛言真實便當學。不學爲人成大錯。我見多少遠佛人。眼前事事強摸。

法華大意

三

索。

授記品第六
授記者乃大聖人付授記。保其人於千萬年劫之後還如今日之言。無少更變也。蓋當人有真信真向。而夙習未忘。故至聖有真見真知。而保必成就。此爲佛之能事。悟道之極功。非佛不能。非悟莫及。以世間庶聖預知不過千年萬年。尚不知其的實。以世間頴悟篤守者。不過一生兩生。尚有昧其根本。何得知人於百千萬億劫之後。更千百萬億劫了了分明。不失今日之言。何得領人之命。百千

萬億生之後。更有千萬億生。一一洞徹。還得今日之記。大哉授記。非大聖人而不能。非真悟者而不獲。真悟者何。悟自已妙性。大而無外。細而無内。前而無始。後而無終。大聖者何。證自已妙性。後而無終。前而無始。細而無内。大而無外。以證其後也。無終其前也。無始故前後際斷成一心也。以悟其細也。無内。其大也。無外。故小大情空圓一性矣。以圓一性。故自絕生佛之假名。雖百千萬億之變遷。可類浮雲於天。於天何損益乎。以成一心故。自無自他之影迹。雖百千萬億劫之久遠。可比虛泡於海。

於海何加減乎。故曰識得一萬事畢。更何疑哉。舉如意云會麼。若於此會得。會古今於一念。收刹海於毫端。却是人人固有不難之事。其或不然。聽說山偈。一年三百零六旬。日日皆是此心覺。若是此心果有遷。已隨三百六旬錯。問曰。如何是已隨三百六旬錯。師曰。食飯不知食飯者。著衣不識著衣人。曰。恁麼則六根門首無人會。惹得胡僧特地來。師曰。伶俐闍黎堪領佛記。

化城喻品第七

此一品經。申說諸佛開權顯實之大意。蓋法周譬

喻。既悟一佛乘。如登寶所。恐下根生退。自謂機小而莫及。故引化城喻以曉之。化城乃化作不實之城。以止息退墮機小之衆耳。既得止息。進力漸生。乃滅化城。復使其進務到寶所。如佛知人不堪大法。權以變粗形爲妙質。易短壽作長年。以漸教之。人心既純。復說大法。令悟本來是佛。此品又謂之因緣周者。謂佛爲我等。故曾於往昔經無量劫。以此妙經教化我等。我等今日得聞妙經。若不信是。自昧夙時之正因。亦失見世之好緣者也。舉如意云會麼。若於此會得。如子見父母。如暗遇燈燭。大

通智勝佛却是青州布衫大聚寶所何別庭前柏樹仰觀俯察至道縱橫左顧右盼至神充塞更說什麼前際後際這邊那邊其或未然須向靜室中放下更放下世緣如紅爐點雪提起再提起道心若順水推舟一旦工夫做熟當自大悟云寶所無寶所成佛非成佛三千界而物物全真百萬劫而時時圓覺到此田地化城也如空舍空寶所也如鏡照鏡更何疑哉請聽山偈一聲鼓響大家聞却許何人識鼓神識得鼓神周徧處塵塵刹刹是全身問曰如何是鼓神周徧處師曰你還聞麼曰學

人不聞師曰你還記得話頭麼曰學人記不得師曰塵塵刹刹是全身曰請師直捷處道一句看師曰聽說山偈若要直捷莫妄想妄想恐墮世緣網須知十方三世間總是沙門一隻眼爾時大通智勝如來至十二行法輪

此一段經意大畧只是言大通佛既受虔請應機說法後乃各得悟解各各成道果更無他說然講以悟解爲宗禪以入妙爲本某濫叨講肆亦辱禪門試以三轉十二法輪重拈一遍未以禪家眼目畧陳梗槩夫三轉者示相轉勸修轉作証轉作証

轉者謂我已証汝亦應証勸修轉者示善道路宜應進學示相轉者示四諦法便知向方四諦法者謂苦集滅道四聖諦也謂之聖諦者謂此四法皆是大聖人諦實之法也何以謂之苦地獄餓鬼畜生三惡趣是也佛說此三處苦者以此三處俱受逼迫不得自在故名苦諦何以謂之集殺盜淫兩舌惡口妄言綺語貪嗔癡十惡是也佛說此十惡皆是召衆苦之本故名集諦何以謂之滅諦冲虛妙粹清淨常樂是也佛說此地衆苦不能侵一靈常寂滅故名滅諦何以謂之道諦三十七品修道

名教是也三十七品者四念處四正勤五根五力七覺支八正道四如意也如是三十七品若講說入海算沙總是其體而已矣如是三轉四諦成二行法輪上根一轉卽悟中根二轉乃明下根必須三轉舉如意云會麼若於此會得千山勢向嶽邊止萬派聲歸海上消佛法世法打成一片道念情念融作一心直得無法可說是名說法其或不然山僧有偈但能不作三途業三十七般法亦空無事道人常打睡任他日月自西東問曰如何是無事道人師曰不除妄想不求真日還了得生死

也無師曰。你喚恁麼作生死。曰。恁麼則無明實性。卽佛性。幻化空身。卽法身。師曰。如是如是。

五百弟子受記品第八

此一品經。佛爲下根不悟。說因緣一周。明夙世因緣之事。滿慈子等五百領悟。自述云。元來十方不隔。三世不遷。性本圓明。心本靈妙。但當人拘於根塵之偏。固於形器之小。舊習不消。所以有成佛不成佛之分。授記不授記之別。豈佛心有揀擇而授記諸子有上下乎。舉如意云。會麼。若於此會得。根塵迥脫。不異消片雪於紅爐。夙習頓空。宛若破輕

漚於大海。一卽一切。盡乾坤是個法身。一切卽一。亘古今。通爲佛智。其或不然。須要靜中獨獨看個無始無終。無內無外的竟是何物。工夫純熟。打成一片。必當自悟。云成佛不成佛。俱是辨空花之濃淡。授記不授記。俱是較兔角之短長。如到此地。繫珠之親。親亦我也。醉酒之我。我亦親也。更何貪苦之可拋。何富貴之可得哉。再聽說偈。一個圓明淨覺心。人人本具。是他尋。必蒙授記方成佛。總是將金去換金。問曰。如何是授記方成佛之事。師曰。掀天功業。世無對。不得封侯。也是閒。曰。恁麼則理雖

圓具。習要漸消。道總已成。還須佛印。師曰。聽說古偈。壯志稜稜。鬚未秋。男兒不奮。不封侯。翻思清白傳家客。洗耳溪邊不飲牛。曰。如是則不除妄想。不求真師。曰。一道孤光。洞徹古今。

授學無學人記品第九

此一品經授記之說與前授記品說同學者明白本性而漸斷惡習。無學者得悟自性而舊習減盡。或曰。得悟本性。習惑滅盡。蒙佛授記。將來成大聖人。宜矣。只如纔欲明性理。纔欲斷惡習。亦蒙授記。當來成大聖人。理恐非宜。智人答曰。人之本性。性卽理也。元無聖凡之名可稱。元無善惡之迹可指。豎窮三際。橫遍十方。但以當人不知。或隨氣稟而有異。或拘習染而自差。所以有學無學二者之名。果能一念回光。復還天性。則無邊惡業。直下頓消。無邊功德。一時具足。更說什麼學與無學。故永嘉云。証實相無人法。剎那滅却阿鼻業。若將妄語誑衆生。自招拔舌塵沙劫。舉如意云。會麼。若於此會得。頭頭總是。物物全彰。大而天地。衆而萬物。微而念慮。無不是。祖師西來。意無不是。七軸蓮花。無不是。道人妙用。其或未委。須向靜中參究。萬法歸一。

一歸何處。工夫久久當自覺悟。十世古今始終不離於當念。無邊刹海自他不隔於毫端。乃自家舊物耳。再聽說偈。夙習未消須要減。習消學滅總虛言。人言有水皆涵月。我道無雲便是天。問曰。如何是無雲。便是天。師曰。聽說山偈。圓明覺體本如然。昧者不知道。有言既肯迷雲都掃盡。緣何不是大青天。曰。恁麼則但離妄緣。卽如如佛。師曰。闍黎如此。大家回向。

法師品第十講品名至菩提兩段

此一品經推尊弘法之足以爲天人師。聞法之人

亦必成佛無疑。故曰法師品。

再舉

爾時世尊因藥

王菩薩至三菩提此一段經廣記。一乘八部四衆

再舉

但聞妙經皆得成佛無疑者也。

再舉

佛告藥王至

三菩提記。此一章經特記濁惡之時。聞此妙經。乃至一句。一念隨喜。亦得受佛尊記。然此妙經卽人

人自性之理。以人人自性元與十方大聖人無少間隔。以無少間隔。故聖人間出。闡揚至道。莫不皆

指此性廣無涯際。壽無終始。萬善圓具。萬理圓通。本來是佛者也。以人不明此性。故於此性上起人

我見其見。旣萌則萬別千差之取舍憎愛。如奔蟻

旋磨無有了期。以不悟此心故於此性上生逆順。情其情既立。則萬種千般之喜怒哀樂似老象泥。泥無有出日良可嘆也。故吾佛大聖人。以四生同體之仁。以萬類同知之智。生大憐愍演此妙經。直指人人本具妙性。本與十方大聖人了無毫髮間隔。欲令人人一同悟入復元來田地者也。如是只恐不聞不信。但聞但信將來成佛。如麵作餅。如白受采。豈難事哉。舉如意云會麼。若於此會得全身領荷萬物。一馬也。何真。何假。天地一指也。孰是孰非。其或躡躅山僧有偈。當人只恐信不篤。信得篤。

時心卽佛。如施五彩白紙中。不須百樣功勞碌。問曰。經云。若聞一句亦得當來作佛。未審學人還成佛否。師曰。你道那個不是佛。曰。恁麼則人人本具。個個圓成。師曰。闍黎若是更躡躅江北江南。問王老。

若復有人至生此人間

此一章經。科家謂之推尊其人。謂惟六種法師也。六種法師者。一受持經。謂領受妙道。永無退失者也。二對本讀經。謂尊道而行。不越毫髮者也。三離本唱誦。謂熟於斯道。左右逢源者也。四爲人解說。

謂已道既得以道化人者也。五書寫流通。謂道德既明。萬人取法者也。六供養經卷。謂以道自重。備修衆善者也。然俱稱爲法師者。此六種人。皆可爲人中模範。海內舟航。堪當恭敬。或曰。佛特推尊之者何。蓋此妙經。卽人人本具之至理。以理不明。故經無量。百千劫於生死海頭出頭沒。無有盡日。今若得聞此經。則經理昭然而不昧。至道條然而不亂。以不亂故。折旋俯仰。皆合先聖威儀。以不昧故。念慮語言。皆是先佛玄妙。玄妙旣與先佛相符。威儀又與先聖無異。烏得不以法師稱之。特推尊於

衆人之上者哉。舉如意云。會麼。若於此會得。俯仰皆是妙經。鳶也宣揚。魚也宣揚。左右無非妙道。柴也書寫。水也書寫。其或不然。須向靜中看。個喜怒哀樂的主人翁。畢竟是何面孔。忽地悟來。便不受人瞞。元來如此。元來如此。如若再疑。山僧有偈。竹翠花黃。總妙經。讀經真眼許誰明。今朝山野午拈拂。昔日瞿曇曉見星。向上有關時。打透現前無。道不圓成。當人於此真能領。萬古天人師可稱。問曰。今朝山野午拈拂一句。學人不會。師曰。今日將午。山僧講經。手拈拂子。有什麼不會。曰。恁麼則運水。

法華大意

三

搬柴拈匙舉筋無不是祖師的大意也。師曰。金屑雖貴落眼成塵。曰如何是直捷一句。請師對衆宣揚。師曰。你肯念佛無人掩住你口。

藥王若有人

至其罪甚重

藥王若有人問。必得作佛。此兩句經。言必得作佛之義。再舉何以故。若善男子

至種種供養者

此一篇經。言六種法師皆當以佛供養而供養之。以其成佛必矣。再舉藥王當知。廣演此經。此一行經。言如上六種法師皆再來菩薩也。再舉若是善

男子

至廣爲人說

此一段經。極讚說經功德。再舉

藥王若有惡人

至其罪甚重

卷之二

妙經

此數句經。極稱妙經。毀之者其罪甚重。其才雖不敏悟。亦有宗敢以毀

佛毀經之罪輕重拈一遍看。蓋諸佛居殊方之國。

妙經卽當人之妙心也。故毀經是毀自己之心。雖

一言而難懾。罵佛乃罵殊方之佛。故惟年久而可

消。甚矣。欺心之去道。小則墮貪嗔痴之三惡。大乃

積殺盜等之萬惡。或狹隘而崇尚偏真。或圓融而

輕慢小善。或是一已之一而不知一之至一。或執

毀妙經者也。心既無始無終。罪亦無休無歇。豈不

法華大意下

七

東京大学総合図書館所蔵

然乎。舉如意云會麼。若於此會得。不可毀。不可讚。體若虛空勿厓岸。其或不然。須向靜中看得能看。經者竟是何物。於此有悟。當自覺云。天地之塞吾其體。天地之帥吾其性。民吾同胞妙蓮華字字分明。物吾與也。蓮花妙行。行顯露。或再有疑。山僧有偈。自心卽是妙蓮華。頃刻迷來有萬差。劍樹刀山高岌岌。鏤湯爐炭苦牙牙。披毛戴角輪廻久。冒暑衝寒歲月賒。切忌等閒開口謗。忙忙何日是歸家。問曰。如何是不毀妙經一句。師曰。諸惡莫作。衆善奉行。

藥王其有讀法華經至三菩提故

更息而皆水其身

此一段經。吾佛大聖人滿口極稱讀誦。此妙經之人。且道佛語誠實。而滿口極稱。其必有意。某學雖不廣見。則頗真試。以此經深處畧發揚看。夫妙經所詮之廣大。卽當人自性之廣大。妙經所詮之義理。卽當人自性之義理。妙經該始該終。而貫徹古今。節當人自性該始該終。而貫徹古今。妙經通真俗。而圓融。物我。卽當人自性通真通俗。而圓融。我見此見。既生六十二見。乃至萬差輪迴不已。良

以當人不悟自性於自性貫徹之地立藩籬界此
界既立萬八千界乃至無量區域何窮嗚呼不有
大聖人演此妙經。直指妙性使人人頓悟則藩籬
之重重何日而徹輪廻之轍輒何日而休今既聞
此妙性有如是之廣大有如是之義理有如是之
貫徹有如是之圓融則其聞經之人成佛必矣佛
無二佛烏得見性之人不爲佛所荷擔性唯一性
豈曰聞經之人不堪如佛恭敬舉如意云會麼若
於此會得如室中之暗縱百千年燈能頓破而皆
明如海上之波縱千萬尺風能頓息而皆水其或

不然。山僧有偈。波即是水。燈即是火。伶俐高人。再莫問我。問曰。既是聞此妙經。皆得成佛。且道今日說法有幾人成佛。師曰。會麼。曰。不會。師曰。闍黎早已成佛。只是不知。曰。知則如何。師曰。無明實性。卽佛性。幻化空身。卽法身。這句被公案家變來去

爾時世尊欲重宣此義。至法華最第一

道有一生之道。有始終究竟之道。此經乃終始究竟之妙道。人莫能悟也。此經爲之究竟道者何。直指當人妙心。前前無始。後後無終。大大無外。細細無內。以無外無內故。宇宙洪纖之充塞肺肝動靜之幾微。無非本然之妙。而當人自不悟也。以無始無終故。元會天地之聚散。頃刻念慮之變更。亦無非本然之妙。而當人自不明也。既悟且明。則往古來今。轉爲自心之本寂。四維上下。轉爲自性之真常。如是則此經之功。非掀天動地可比。蓋掀天動地縱富貴綿遠。不過百年之間。得聞妙道。則直下

轉凡成聖。息生死於無窮無際。豈掀天動地之可比哉。信此經之德。非益世才能可並。益世才能縱與奪自在。不過四海之內。得證妙性。則直下返本還元。明善復初。致中庸於不偏不倚。豈益世才能之可並哉。此所謂道之妙道也。吾佛爲天下人之人者。何生卽有目顧四方。手指兩間。週行七步之神氣。長乃具學。通萬典。力超三界。量包千聖之天才。七日若不出家。七寶自至。而輪王之位必登。六年既得已辨六通。自在而諸佛之心圓證。由是談經三百餘會。凡有耳目。莫不聞見。而盡心依學。住

世八十一年。凡有血氣。莫不尊親。而盡已依從。度
緣既畢。教化亦周。歛神復入光明歲號曰涅槃而
厥本歸根流芳不已。化火自焚金剛軀名曰舍利。
人間天上建塔猶存。此所謂人之至人也。毀之者
是不識至人者也。經亦有謗之者。是不悟妙性者
也。嗚呼。自天地開闢以來。演唱斯道者孔孟程朱。
孔孟未見佛經。且置之而勿論。程朱親見佛經。尚
曰夷狄之小法耳。至人豈容易識乎。妙道豈容易
悟乎。識人悟道。既爲難事。宜乎極超誠明之地之
至理。一而已矣。法華最第一之語。豈欺世誣民哉。

舉如意云會麼。若於此會得佛法世法。打成一片。
聖情凡情。元沒兩般。融釤鉢於大冶。頓滅釤鉢之
名。會溝瀆於大川。頓絕溝瀆之味。其或不然。山僧
有偈。莫言你高。莫說我病。但看末後。安身立命。問
曰。如何是安身立命一着。師曰。會卽龍女頓成佛。
不會善星遭陷墜。曰學人不會。師曰。見賢思齊。內
疚不省。曰恁麼。則當人要具眼。不可錯下脚。師曰。
萬古乾坤。一朝明月。

爾時佛復告藥王。至當知是人得近阿耨多羅三藐
三菩提。

爾時佛復告藥王至最爲難信難解此節經意言妙法理深難解再舉藥王此經至況滅度後此節經意言非器勿傳再舉藥王當知至手摩其頭此一節經意言持經之人功勝持經卽修道精誠再舉藥王在在處處至如來全身此節經意言修道之處應敬如佛再舉此塔應以一切至三菩提此節經意言非止修道之人可敬修行道人所居之地亦可敬而生福再舉藥王多有人至三菩提此節經意通前大意總是尊尚法華之意其才疎學淺行欠名輕特於妙經頗得悟入試爲諸公詳解

洪書

能不能。如是明業。則慎動心於人不知之地。戒行事於人不見之時。蓋出乎尔。返乎尔。形直影端。聲和響順。皆自業所感也。如是乃至若靈明若情性。非理中真。有如是之多事。惟當人於此經明。不明持不持。信不信。之自千差萬別之變也。先哲云。識得一萬事畢。其聞此經之人乎。不能聞此經。則不知道。不知道。則觸途成滯。惡作百端。展轉生疑。怨天怨地。每欲求樂。苦向他尋。不悟自家元是道本。意云會麼。若於此會得。處處綠楊堪繫馬。家家有

路透長安。其或不然。聽說山偈。此經真妙善爲本。不善皆非經上文。大路碍車須去碍。靈臺塵鎖必消塵。裴公綠野堂堪立。文潞香山會可親。今古人皆稱善事。請於善地各留神。問曰如何是妙經悟處。乞師一指。師曰。天地同根。萬物一體。曰。怎麼則莫生二見。卽悟妙經。師曰。但無二見無人我。日日無非是誦持。

藥王譬如有人至說是法華經

此一章經謂之鑿井喻。大凡鑿井向濕泥釆之。知水必近。乾土鑿之。知水必遠。喻修行人得聞此經。

悟明至道成佛近矣。不聞此經。不悟大道成佛。恐難。再舉藥王若有善男子至說是法華經。此一章經。言時爲法師爲人講說。須具三事。三事者。入如來室。着如來衣。坐如來座。是也。蓋座者。悟一切法空是。若不悟。一切法空。則被一切法之所碍。既有諸法罣碍。死生去就。取舍運爲皆煩惱也。自既煩惱牽纏。何得謂之法主。衣者。真得善人君子柔和忍辱心者。是若無柔和忍辱。在處與人相拒。奮怒百端。既奮怒百端。與常人何異。既與常人不異。何以謂之法師。室者。大慈大悲者。是若不慈。則不能。

與人樂。若不悲。則不能與人拔苦。既不能爲拔苦。是無義之人。既不能使人安樂。是不仁之人。既不仁不義。我何以爲人談經。三者同具。是真說法。三者缺一。是讚經之人。三者缺二。聞經之人。三者俱缺。是常人也。舉如意云會麼。若於此會得。不須釋迦授記。而成佛無疑。即是彌勒下世而度人可信。其或不然。聽說山偈。莫道法師尊貴好。法師也要具三般。不然大衆俱褒貶。辨似懸河。亦自曠問曰。如何是亦自曠。師曰。披蓑救火。掩耳偷鈴。曰。怎麼。則自成可以成人。自覺可以覺人。師曰。源潔流清。

形端表正。

法華大意

三

藥王我於餘國至令得具足此一章經言說經效

驗說經卽道德圓具而人天欽崇庶類從化理之自然也。再舉爾時世尊欲重宣此義而說偈言至

得見恒沙佛此偈重宣法師品一遍之義蓋妙經圓示一大之至道法師圓證一大之至人非至人無以證一大之至理而闡揚一大之心一卽大若有以收一大之至教而明貫一大之言非至道無二有三有千萬卽不大之理也大卽一若有彼有

此有分別卽不一之理也既一而大大而一同太極而圓常合大道而冲妙從此發於言言妙經也從此行於事事妙德也用此以致君君堯舜之君也用此以澤民民堯舜之民也如是乃至充塞宇宙貫徹古今一一而大大何莫而非吾心全體大道之妙乎故記曰喜怒哀樂之未發謂之中發而皆中節謂之和中和卽一大之理蓋一則自無喜怒哀樂大則無不中節天地位而萬物育誰曰不然老子曰天得一以清地得一以寧侯王得一以天下和平鬼神得一以靈蓋天之道日月有度數

星辰有腥候。風雨有時若寒暑有節常無一王之則四者皆亂。而天不清地不寧天下不和平矣。如是則一之道乃清寧和平之至道也。舉如意云會麼。若於此會得頭頭顯露。法法全真。其或不然。再聽山偈。一大中和會得來。爹爹元沒兩般腮。從儒從道。并從釋。關鎖重重自打開。問曰。如何是一大中和會得來之理。師曰。等閒識得東風面。萬紫千紅總是春。曰。恁麼則皇天無二道。聖人無兩心。師曰。再聽山偈。此心不必別安排。萬古乾坤一聖胎。除是不求求不得。得時還是一中來。

見寶塔品第十一

此一品經三周法偈。四衆記圓。法身之談既全。本願之心亦足。故感過去之多寶佛。馳願塔以聽聞。遂致現在釋迦尊集分身而開塔。三展淨土。會古今於一念斯時也。廓此心元舊之封疆。收刹海於毫端斯處也。實此性本來之面目。舉如意云會麼。若於此會得舉首低頭。多寶佛不須開塔。揚眉瞬目。釋迦佛豈用會身。奮飛魚躍妙經宣揚。兩施雲行諸佛出現。其或不然。須向靜中萬緣放下。一念專提。看個父母未生前本來面目。如是工夫久久。

必當自悟。本無過去。何有未來。十方諸佛國。即是吾心。一切諸衆生。即是自己。我人之見。既忘。是非之心。自息。到此田地。可謂道。千江有水千江月。萬里無雲萬里天。更若躋蹠。聽說山偈。法身周遍。莫他求。求則分明錯念頭。記得古人。曾有語。騎牛不必更尋牛。問曰。經云。會集十方諸佛意旨。如何。師曰。但莫妄想。曰。分身諸佛。畢集寶塔。乃開意旨。如何。師曰。妄窮真現。曰。三展淨土。廣大莊嚴。以容來佛意旨。如何。師曰。心中莫存世念。曰。怎麼。則探珠宜靜裡。動水取應難。師曰。十方三世佛。俱以靜爲

先。曰。只如靜久。畢竟如何。師曰。動靜成一。乃爲妙處。曰。此經闡明一大。如何是二大之妙。師曰。但莫憎愛。洞然明白。

至偈末

生佛與合

如此偈有一百九十餘句。大畧只是廣讚妙經。難逢難遇。當生敬仰。當盡心奉持。當熟思而有大覺悟也。或不如此。虛生浪死人也。何以知之。蓋此生不聞此妙經。則道無由發明。道既不明白。性不明。性既不明。心之所思言之所發。日所行事。皆不明矣。此生不明。來生復來生。後世復後世。以至無量。

恒河沙數生世。料知皆不明矣。何以故。今日之心萬萬世後之種子也。某才荒學淺。見狹悟微。然於此經畧有入處。試特以適所舉句復講一遍看。夫言一大之妙也。經之一太偈已具言。記之中庸衆亦共曉。老子一妙誰不同知。但於行事之際鮮得中庸。存心之時少見一大。至於取舍去就之頃。行藏念慮之間。非止不一。亦乃千萬。宜乎此經暫讀爲難。讀卽聞道也。非對紙墨之本爲讀也。舉如意云會麼。若於此會得。野色更無山隔斷。月光常與

水相連。其或不然。更聽山偈。妙經一大許誰知。知則中庸可共時。世上事難難却易。此經不遇後難期。問曰。如何是一大之旨。師曰。諸佛法身。當人妙性。曰。恁麼。今日說了。爲什麼又道難聞。師曰。你雖聞此說。如不聞一般。曰。學人字字明白。爲什麼與不聞一般。師曰。便也。聞却信不及。曰。信得及時。如何。師曰。龍女頓成佛。只在獻受間。

法華大意第十二

提婆達多品第十二

此一品經謂之得聞經之機。修道之要。乃成佛甚速者也。蓋天下之衆惡人不能作者。達多能作也。

天下之衆善人不能爲者。吾佛能爲也。以吾佛能爲衆善故。謂之大慈仁。謂之大聖人。具足妙相。天神擁護。飛走欽服。宜其然矣。以達多能爲衆惡故。謂之極頑愚。謂之大罪人。具足醜相。天神誅戮。鳥獸啣冤。亦宜其然矣。此法華會上佛亦授記達多作佛者。顯示惡業迹也。佛性本也。本既存而迹可消罪可滅而佛可證。故引龍女頓成佛之事以實之。又此經世傳有四句口談。正在此品。謂彩雲影裡仙人現手把紅羅扇遮面急須着眼看仙人莫看仙人手中扇。其旨曰。世間逆順百端皆五彩雲。

雲中皆有說此妙經之仙人。以妙經仙人傳來也。又逆順百端難忍難祛之際。謂之仙人手中紅羅扇。當此之際。會得個大而無外。細而無內。前而無始。後而無終。如海受萬派之聲。嶺止千山之勢。便是仙人說妙法華經。不見手中扇也。大凡修學佛者。果能二六時中刻刻子見。無前際後際。這邊那邊。既無我人衆壽。自無取舍愛憎。到此田地。境即心也。心卽境也。我一佛也。佛一我也。龍女成佛猶是有獻受之遲。當體卽真。豈非無記證之別。其或未委更聽山偈。虛空體本絕雲霞。縱有雲霞見自

差。會得虛空本無物。仙人終日說蓮華。問曰。如何是直下頓成佛一句。願師直指。師曰。若要直指。起來禮拜。曰。學人每日禮拜。何待起來。名爲直指。師曰。只是不肯起來。便是不肯聽此妙經。曰。恁麼。則隨順是師學。得見恒沙佛。師曰。闍黎肯如是。處處見仙人。

持品第十三

持者。止於至善之地。不遷不易之正定也。蓋人生於兩間萬類之中。必有知覺之心。既有知覺之心。必有好樂恐懼等念。念之發處。必因逆順憎愛之

境。逆順憎愛之念不已。必有天堂地獄繩竹刑杖苦樂之具。此具既有。則最初之元心。心中本具之至理妙道。隨之而變爲萬別千差矣。不有大聖人。具以知見開示此心。則人人終不能自悟本性。妙體無大無小。無始無終之妙也。妙經既開示。當人能悟入。則此心也。充塞宇宙者。皆謂之妙心。皆妙心。故鳶飛魚躍而不疑。日升月落而自一。則此性也。貫徹古今者。總謂之妙性。總妙性。故死生聚散而不惑。去來動靜而自如。到此田地。晴夜無風。湖心月影。季春雨過。幽谷花香。亦不足以喻持妙之。

萬一也。此處持之。不遷不貳。惟一惟中。可以與諸佛鼻孔一般。可以與千聖肺肝一樣。於此不能持。守被塵境移。可謂道春秋成敗知多少。萬載千年。卒未休。其或更疑。聽說山偈持此經時。萬慮沉。逢違逆順。莫呻吟。工夫做到至誠地。三世十方卽一心。問曰。經中謂持此經。師謂持此心。意旨如何。師曰。經是照心之燈燭。心是持經之堪輿。曰恁麼。則心卽經。經卽心。莫生二見。事卽理。理卽事。本是一根。師曰。更聽說偈了。無毫髮念頭來。純一功深心。自開。七軸蓮花如此守。十方諸佛嘆奇哉。

安樂行品第十四

心無他適而自若。謂之安。性得其所而圓順。謂之樂。久不變動而功高。謂之行。如是之行也。謂之妙行。如是之樂也。謂之妙樂。如是之安也。謂之妙安。蓋有大道爲之主宰者。凡百欺心之順事。違理之順得。逆天之順享。皆不愛也。有妙經爲之印證者。凡百本性之衆善。克己之多勞。諸佛之妙德。皆勤修也。以能勤修。如上聖德賢行。始可謂之修行之善業。修行既善。凡百毀謗輕慢之言。自無灾障。汗穢。

之事自絕。從此光明廣大。道德尊崇。現世爲天人師。他日登佛聖地。誰曰無是理哉。舉如意云。會麼。若於此會得心如皎月。體似虛空。十方無不仰其高。萬姓無不稱其妙。如或不然。須向靜中切切舉個阿彌陀佛。復自驗云。念佛者何心。不念佛時何物。工夫打成一片。當自悟云。佛外無心。心外無佛。到此田地。可謂道上天下地彌陀佛。魚躍鳶飛。白藕花。更有何人還不悟。痴痴門外問三車。問曰。如何是門外三車。師曰。羊車鹿車大牛之車。曰。羊鹿車時如何。大牛車時如何。師曰。葵花向日。柳絮隨

風。曰。恁麼則信向大乘。莫隨小見。師曰。更聽山偈。要能安樂行無虧。念念心休向外馳。日久功深成一片。大千世界碧琉璃。

從地湧出品第十五

此一品經。因六萬恒沙菩薩各有六萬恒沙眷屬。一一菩薩眷屬各曾無量劫修習。具黃金相。具清淨梵音。具廣大辯才。具至聖道德。忽從地湧出。敬禮吾師。稱云。是我等師。我等慈父。開示我等。得成妙道。時衆皆疑云。吾佛出家未久。成道亦後。何以從地湧出六萬恒沙大菩薩。各各領六萬恒沙菩

卷之三

薩眷屬各來禮敬。稱師稱慈父。譬如百歲老叟稱二十五歲少壯爲父。父亦喚百歲老叟爲子。是可疑也。蓋此疑者不知吾佛根本遠自無量不可量之前。悟此妙道。證淨妙身。常居實際之地。常起我人衆壽之四相。起惑作業。妄自升沉。乃示同生滅。演教度人。欲人人還復本源。同歸實際。此吾佛之本意也。如是會得六萬恒沙之廣衆信向。豈爲過哉。乃至盡法界悉同證妙身。同成正覺。亦不爲多。於吾佛久近。亦不須疑也。嘆聽說山偈。法身無去亦無來。可嘆時人空自猜。三際十方俱坐斷。乾坤

信是眼中埃。問曰：如何是三際十方俱坐斷？師曰：會麼。曰：學人不會。曰：乾坤信是眼中埃。

醫師喻。羅絡始終。謂之佛壽。包括空有。謂之佛量。得佛之量者。一日月周旋之界。空中一塵。盡空塵之天地。海中一漚。極海漚之廣濶。乃性天之微塵耳。悟佛壽者。一元會該攝之時劫中一刻。盡劫刻之運世。年中一息。極年息之久長。乃理曆之瞬息耳。蓋斯道之體。其前無始。其後無終。大而無外。細而無內者也。以衆人不知。我我間隔。物物偏私。所

1 2 3 4 5 6 7 8 9 100

謂無始無終之圓物。遂離之爲元。會運世時矣。所謂無內無外之大體。遂裂之爲東西南北之方矣。既有方向。外而曰蠻。曰夷。內而曰華。曰夏。烏得不張王李趙。爾汝比隣乎。既有壽年。近而曰元。曰宋。遠而曰羲。曰皇。安得不年月日時。往古來今乎。嗚呼。吾佛大聖人宣揚此壽量品。良有以也。將長人之短促而至究竟乎。將廣人之狹小而至太極乎。將欲人人徹悟而叮嚀教誡乎。不然。何以醫師之喻而再四勉旃乎。舉如意云會麼。若於此會得。不隨往而往者。此靈心也。不隨來而來者。此靈心也。

不隨物而物者。此靈心也。其或不然。更聽山偈。自從撞入個胞胎。添却元翁多少歎。若是元翁能大悟。此身天地一微埃。問曰。如何是佛之壽量。師曰。世上算師數不得。曰。餘世人與佛本來人。還有壽量也無。師曰。你曾見本來人也。未曰恁麼。則元翁無面目。世人徒自猜。師曰。闍黎。

分別功德品第十七

此經乃宣揚此心之廣大。久遠不滅。不生之妙典也。此心既明。則功德無有涯際。豈容有所分別乎。所以有分別者。非此心之理有分別。乃衆人領受。

之不同。所以功德有淺深多寡也。經中以布施持戒忍辱精進禪定五波羅密。精一修行。經八十萬億多劫所修功德。不如一念信受此經功德。以聞此經。必悟圓滿覺性。以悟圓滿覺性故。必能會無始無終於寂然不動之中。必能會無爲無變於感而遂通之際。如是則豈有爲有變。有年有劫之功德可比擬哉。故曰佛子住此地。卽是佛受用。舉如意云會麼。若於此會得。生死永斷。苦樂無端盡法界總是真常。括古今通爲妙性。演之爲易可以趨吉避凶。頌之爲詩可以移風易俗。如是乃至世諦。

資生無不化爲真。如妙理中庸聖行者也。嘆聽說山偈。此經一句信無疑。便是圓融法界時。萬種有爲皆費力。吾心頓悟卽菩提。問曰。如何是頓悟。卽菩提之理。師曰。若能頓悟此心。則無聖無凡。非空非有。曰。恁麼則本無聖凡人。自迷悟。師曰。杲日卓午。雲消盡。具眼何人不見明。

隨喜功德品第十八

此一品經。極讚聞此妙經功德。無有涯際。不可稱量。故以展教第五十人隨喜功德。以讚之耳。蓋以資生之具。盡心供養他人。以至於老。乃百年之夢。

事亦剝他人來世富貴之利劍耳。於自性何益哉。
第五十人隨喜此經之功德。雖今生不明斯道。乃已種當來成佛之種子。既有成佛種子。同緣會遇。必得親聞妙經。既得親聞妙經。成佛必矣。既得成佛。逆推今日隨喜之爲種。豈資生之幻具。助緣之夢爲可比。成佛之大功。了生死證涅槃之大事乎。舉如意云會麼。若於此會得無邊幻妄頓滅無餘。無窮生死頓消無迹。盡大地作沙門一隻眼。了無毫髮之疑。盡十方是箇自身。亦何嘗擬議其或不然。須向靜中自看。父母未生已前。今日之思量計較者。畢竟在何處安立。看來看去。必然有悟云。我本不生人何曾滅。衆生諸佛悉是假名。五教三乘皆爲虛說。到此田地。可謂道一條大道。本無迂。自是當人見識遲。今日肯能真領悟。目前何法不如如。問曰。如何是如如。師曰。綿州附子漢州薑。曰恁麼萬別千差。如如之理何在。師曰。會得時。本無千差萬別。曰。如是則見自異而自差。體本同而本一。師曰。不可隨語生解。曰。畢竟一歸何處。師曰。山僧不知當人自看活套。曰。隨喜妙經。既有無量功德。且道今日信某禳灾一句作麼生道。師曰。似日消。

東京大学総合図書館所蔵

清霜如火焚枯草。

法師功德品第十九

此一品經演出得此經之靈驗。蓋妙經所詮者性道也。悟此性道者形雖凡夫心卽佛也。心旣佛之妙心。乃一心上帝則主宰乾坤。化生萬物者也。心旣如佛。則一身隨之而妙。身旣隨之而妙。則六根能具廣大神妙。六根旣妙。則六塵悉能隨神指呼。能一能萬。能短能長。乃至手取天地外之物。如手拈香。眼視往古來今之事。如眼觀掌。亦真圓證本心之常事者也。何法師功德廣大之可疑哉。舉如

意云。會麼。若於此會得。佛一我也。我一佛也。彌陀與我不是兩般。我與達多元非一質。融萬象成一法身。會古今卽一知見。其或不然。須向蒲團上靜坐二三十年。单单看個大而無外。果有外乎。果無外乎。前而無始。果有始乎。果無始乎。始處得其實。終處亦真。外處得其真。內處亦實。悟到此。田地謂之知。至究到此。田地謂之物格。衆如有疑。聽說山偈。此心神妙。人人佛。自是人人不自知。肯信山僧輕一點。六般神妙任施爲。問曰。適云六般神妙任施爲。師亦法師。六般神妙還具足也。無師曰。我又

不是法師。問什麼具足不具足。曰。適來高座敷演。大衆蒙益。爲什麼不是法師。師曰。若喚作法師。不值半文錢。曰。不喚作法師。意旨如何。曰。糟粕人間。真打透。庵義畫畫是秦灰。

常不輕品第二十

此一品經。演唱能行此妙經之妙行。必將成佛者也。蓋嘗靜思之。人生於天地間。醉生夢死者固不在此論。但有少覺悟者。試爲詳裁之。夫妙經乃演人人本具之性理也。圓滿覺性固無欠而無餘。蘊積妄情實有生而有滅。妄情旣有。生起消滅之道。

豈無故。吾佛大聖人引起往昔爲凡夫時。初得覺悟。修行以爲今悟。妙性修行模範也。妙行有三。曰平等行。曰無相行。曰無我行。無我則心量廣大。見識淵泉。菩提涅槃而日日增榮。解脫智慧而時時深入。故曰無我而大大而化之。謂之聖。聖而不測。謂之神。無明逆順之境忘於外。善惡之機息於內。無好樂憂患之念萌。絕利欲爭奪之念舉。故曰守其無相。相固常有。體其無體。體固全真。平等則雖究親而不同。實究親而共性。雖男女而有別。實男女而同根。廓七尺軀爲大千沙界。廣一寸心作太

極圓圖。故曰心同虛空界。示等虛空法。証得虛空時。無是無非法。如是則萬事紛紜而常一。萬法變化而常真。收萬古於一念慮中。會塵刹於一毫頭上。到此田地。誰曰成佛更有遲疑。果若更疑。聽說山偈。此心平等忘人我。雖未修行佛已成。若道山僧言不當。不輕菩薩可憐生。問曰。不輕菩薩授記一切人是佛。且道蒙授記者還有不成佛者麼。師曰。只你不成。曰學人爲什麼不成。師曰。你若肯成。不將再問。曰恁麼則直下承當。更休擬議。師曰。善哉大丈夫。

如來神力品第二十一

此一品顯示佛佛具如是神通妙用也。然以世眼觀之。則黃帝乘龍。藥巴噀酒。龐婆入石。長房縮地。皆罕見之難事。誠以道眼觀之。則維摩丈室容百萬之多座。釋尊一時歷百千之長年。一舌抵初禪萬萬里之高。一聲遍十方萬萬界之廣。亦大聖人之末事。何以如此。以吾性無方所年劫者也。此性既無方所年劫。則歷不可數之元會。自心何嘗少間。如是則於一念頃經無量恒河沙之大劫。乃至一語一默。光照十方。一抑一揚。聲宏萬世。皆佛之

小事。性之影子耳。舉如意云會麼。若於此會得。一卽一切。一切卽一。往古卽今。今亦往古。其或不然。必當久靜一二十年。看個已往年歲爲什麼。此心不隨未來而不覺。現在萬物紛紜爲什麼。此心不隨萬物而獨知。如是反復參究。久久純熟。當自悟云。冲虛妙粹。炳煥靈明。卓然而獨存者也。到此田地。百萬神通妙用。皆運水搬柴之易。又何難之有哉。嗟。再聽說偈。蓮水搬柴一妙神。自家不悟可憐人。今朝頓悟。從今後。土塊泥團卽法身。問曰。如何是泥團。

卽法身。師曰。天地之塞皆吾體。天地之帥皆吾性。曰。如何是要妙一句。師曰。一片寒光吐吞萬象。

囑累品第二十二

囑累者。以言托之曰囑。以法系之曰累。欲使傳續妙法。利達無窮。故曰囑累。蓋此妙經三周已畢。大道斯圓。若不付托得。演說一場無益。其才荒學淺固非付托之人。因正緣真敢任流通之責。試再爲詳拈一遍看。夫法者何法也。卽吾佛大聖人經無量久遠年劫修習之正法也。此正法之意者何意也。卽人人本具之性理也。何謂性理。卽吾心豎窮

三際橫遍十方。萬善萬能之實理也。此之實理。雖人物共稟。但不能自主。而隨形器根塵之所幻惑者。靡靡皆是也。故吾佛大聖人最先覺悟。愍衆人之不悟。乃示同生滅。演此妙經。直指當人之性。如是而已矣。性理既明。留言可法。故特運大神力。以一手摩萬億多衆之頂。自稱此經難得。具諸佛大道德大神通之秘藏也。宜各受持流布。如法修習。如我無異。是至囑也。舉如意云會。若於此會得着衣吃餅。二聖寶塔儼然。舉手擡頭。七卷蓮經在爾。其或未委。山僧有偈。一乘義理自家性。七軸蓮

華紙上心。我愛普賢。曾有說教。人莫向外邊尋。問曰。如何是囑累末後一句。師曰。切忌生疑。曰。學人尚不曾信。疑從何生。師曰。信也好。疑也好。曰。疑也好時如何。師曰。四生六道劫時長。換面改頭增懊惱。曰。信也好時如何。師曰。三賢十聖性天廓。八解六通心地寬。

藥王菩薩本事品第二十三

此一品經。示藥王燒身煉臂供養此經之迹。以顯此經尊崇玄妙。不可得見之難。蓋燒身空我相也。煉臂忘我執也。我執既忘。始可與之論。一大之至

理我相通絕始可與之言一大之真常舉如意云會麼若於此會得毘盧妙體與一片白雲橫谷口而無殊大藏靈文共幾多歸鳥盡迷巢而不別其或不然須盡掃蕩智中舊習。单单念句阿彌陀佛初舉之時雜念紛飛。凡情交錯久則純熟一心圓寂萬境如如到此田地必當自悟十世古今始終不離於當念無邊刹海自他不隔於毫端燒身也煉臂也如雲去雲來天本淨此方也他界也若花開花落樹何關更何疑哉再聽山偈只怕此身煉不盡此身燒盡我無依是名苦行流通旨珍重當

人善護持問曰是名苦行流通旨其意如何師曰行不苦則志不堅意不誠則念不切曰恁麼則克苦乃入道之初門無我爲成佛之捷徑師曰再聽山偈放逸名爲不立身豈能成佛號圓人既然要做丈夫漢須掃從前懈怠塵曰力進一句再請師道師曰若不力行成不得百年容易暗消磨不如當下便行去萬古令人出愛河。

妙音菩薩品第二十四
妙音者宣揚此經之具也故吾佛大聖人示此以表揚妙行流通也夫妙經之旨在人人分上謂之

覺體。在佛。佛道上謂之三藐。此謂正等。在人事取舍進退之宜。謂之道。在覺體廣大圓融。謂之佛。在吾佛隨機應化宣示。謂之經。在慮空念寂之地。謂之定。在無人無我之時。謂之空。在解怒絕慾之頃。謂之力。如是乃至動靜紛紜。彼此一萬有無量百千萬億名善者。皆此經之妙旨。惡則皆凡下之愚情也。故妙音能種種示現。輔贊此經。以表妙行流通也。舉如意云會。若於此會得任短任長。休剪綬。隨高隨下。自平治其或不然。莫道死來真作一安身立命。恐多般。世間多少英靈漢。多少臨終被

熱瞞。於此心果未安。還須念句彌陀佛。心心卽佛。佛佛惟心。忽地打成一片。當自大悟云。本無生死。及升沉。廣大冲虛妙甚深。從今不受人瞞却。萬古乾坤號妙音。問曰。如何是妙音之旨。師曰。一而萬。萬而一。體露堂堂。曰恁麼。則無一物不是。毘盧之體。無一名不是。吾道之名者也。師曰。再聽山偈。乾坤萬別與千差。識得元來只一家。於此既能真會得。何人脚下不蓮花。

觀世音菩薩普門品第二十五

普門者。示以觀音妙智觀力。契機圓行。而進於妙。

音無緣慈濟。響答大千。而普應無盡也。蓋人人所具妙性。圓滿十方。洞無隔碍。特以衆生業惑幻妄。迷真見聞。覺知遂相吳越。而失本元明塵。消覺淨顯。復圓通者。惟聞機最勝。故楞嚴云。一根既返元。六根成解脫。六解一亡。元明不二。心非其心。無一心而非其法。法非其法。無一法而非其心。一多緣起而恒真。千差涉入而無碍。非普門而何。舉如意云。會麼。若於此會得。觀音菩薩常在諸人面門出入。示現神通力。說無等等法。汝若不會。須以妙奢摩他三昧觀力。回光自看。看到着眼不及處。驀忽

透。便知百千手眼不離自己。苟或不然。試聽山偈。一鏡堂堂萬像俱。大千何處不光暉。迥然不落根塵界。手眼通身却是誰。問曰。如何不落根塵一句。師曰。根塵裡薦取。曰。猶是學人疑處。師曰。耳裡青黃眼裡聲。曰。恁麼則悟來。月滿三期内。迷去雲開六不收。師曰。你喚什麼作月。曰。如何是觀音妙智力。能救世間苦。師曰。蒼波海底珊瑚月。紅焰爐中菡萏風。曰。是則衆苦所不到。師曰。功德不少。陀羅尼品第二十六

此一品經。以陀羅尼標名者。以此妙經理行智果。

四大法圓。若不總收。道無究竟。故以此名品也。梵云陀羅尼。此云總持。卽總持萬法。圓收萬善之密也。某初學此經。以爲誦得乃了。旣誦得了。又以解其義理爲難。旣頗曉解。又以行不得爲難。旣依而行之。不過日用之中。人事之小善耳。來世爲人之志。來世如今之解。皆不得決然由我行藏而無少疑也。由是反覆叅究。忽地如獲舊物相似。從此徹頭徹尾。了無毫髮進退之疑。從此若彼若此。俱有佛祖取舍之斷。故敢以妙經爲人發明也。夫圓收萬善。總持萬法。果是何道。卽人人本具之妙心也。

人人旣具。何以輪轉六道。汨沒四生。到今不了。復如之何。以人人本具。不遇良友指教。又無自察之才。則終身不明。今旣不明。則知萬萬世後。萬萬世徒生死。終無了悟之緣。所謂本具妙性。徒本具者也。嗚呼。我等夙培善種。幸獲正教。宜當革故鼎新。必究必行。必成必了。豈不快然於自心乎。豈不爲如來使。往來三界乎。豈不與十方諸佛歷代祖師把手共行乎。豈不謂之圓收萬善。總持萬法乎。舉如意云會麼。若於此會得。可謂道打開華藏重重海。獨露堂堂大覺場。其或不然。須是入秘密關。立

總持志。揃三十年工夫。单单念句六字真言。坐與真言共坐。卧與真言共卧。乃至言語作息俱與真言無二。如是則必有融成一片之時。必有三世十方正等之日。必有凡聖悟迷本只一心之見。到此田地可謂道太虛三萬六千頃。月在波心說向誰。更有人來伸一問。山僧合掌念多疏。問曰如何是多疏二字。師曰此是藍婆咒。不須義上疑。曰咒卽不問究竟。總持一句作麼生道。師曰多疏多疏兜醜醜。

妙莊嚴王本事品第二十七

此妙莊嚴王本事品者。舉古例今。欲使行人以道自衛。消息邪緣。不墮垢染。而竟果德。亦以見利行同事。轉邪歸正者。良由受持此妙經力。而不失方便之權也。然則不染而染者。妙莊嚴也。染而不染者。淨德也。蘊真如之妙理者。淨藏也。破痴暗於智照者。淨眼也。故能轉昔日之妙嚴爲今日之華德也。且道如何是此妙經力。舉如意云還會麼。若於此會得。五蘊浮雲空去來。三毒水泡虛出沒。如或不然。聽說山偈邪。因正顯正。因邪邪。正元來共一家邪。既不生誰是正。寶光匣冷吼青蛇。問曰。昔何

謂之莊嚴。師曰。說莊嚴者。卽非莊嚴。曰。今何謂之
華德。師曰。卽非莊嚴是名莊嚴。曰。方便之力。其事
云何。師曰。劍爲不平離寶匣。藥因救病出金鉢。曰。
畢竟如何得法眼淨去。師曰。功德天。黑暗女。有智
主人。二俱不受。

普賢菩薩勸發品第二十八

此品名普賢勸發者。法會既終。進修功畢。智圓覺
滿。證佛所證。法化流通。無復自利。直以善入世間。
三昧無作願力。現無量色身。自在宏化。轉入妙覺。
向上之道爲果。後常行也。自是而往。橫身十界。高
踏毘盧。泯三世而無際。亦無無際。洞十虛而無方。
亦無無方。生死涅槃。誰忻誰厭。佛窟魔宮。無取無
舍。如是相。如是性。如是體。如是力。猶涉化機。大無
外。小無內。前無始。後無終。未超見量。舉如意云。會
麼。於此會得。露柱燈籠頭頭實相。牆壁瓦礫一一
光暉。麻三斤栢樹子。塞斷玄關。乾屎橛死貓頭掀
翻妙塞。如未究竟。再聽末後一偈。鶴出銀籠。橫碧
海。鳳離金網。拂雲衢。祇應不戀長安樂。到處逢人
是故知。問曰。如何是到處逢人。是故知。師曰。煩惱
海中爲雨露。無明山上作雲雷。曰。此莫便是普賢。

常行否。師曰是卽是。莫差誤。曰如何得不差誤去。
 師曰客來須待。賊來須打。曰如是則覓火和烟得。
 擔泉帶月歸。師曰不防靈利。曰恁麼則七軸玄文
 宜爲剩法。師曰瘥病不假驢駝藥。曰還有不病者
 麼。師曰你且道誰是病者。曰是則安用勸發。師曰
 爲汝不薦不病者。曰向上事又作麼生。師曰早成
 向下去也。曰學人不會。乞師方便。曰任從滄海變
 終不爲君通。

○附天池沙門法聚頌

宗教明明沒兩途。漫從取舍強分疎。衣珠未示珍

何失。寶所親登路早迂。鵠噪鴉鳴圓極唱。山明水
 碧露真模。拈花昔日今如意。一種金蓮火裡敷。

○附陳白沙寄太虛上人一首

餘不盡錄

太虛石洞居。孤絕少人依。遠客携琴至。逢師乞食
 归。一蒲青草上。四面白雲飛。盡日無言說。巖花落
 满衣。

考誌江都寶勝寺。唐貞觀年間。僧智端啓建於揚
 子橋。國朝江水壘沒。揚州衛指揮李鑑僧太虛
 遷於城東三里。今云寶城。無考。疑卽寶勝。俟再詳。
 法華大意卷下 終

法華大意後序

金陵太虛相師昔與陳白沙章定山諸老先生相友
善既多論述及見

孝宗皇帝復有講章詩篇。若雜文諸稿。維揚士大夫家有藏之者。今不易得也。渭孩時舍名稱師兄者。玉北菴。往歲閉關龍南精舍。適鄉人李君良忠過訪。爲王兄道其兄梅峰居士遊維揚時。登太虛樓訪師所遺。得法華大意本於住僧某而歸。玉兄後三年出關。復得是本於王龍溪先生所。而本固缺後三品。適玉兄之師玉芝大師至自武康。足成之。玉兄受之。遂較

刻以廣其傳爲卷凡三字七萬。布施者若干人。費銀若干兩。工再月而成。既成而玉兄持本以來。令渭序其來歷如此。若夫要旨所關。已標指於前序中。雖然。如聞六祖之言。心悟轉法華。心迷法華轉。然則經且不可恃也。而况於區區之大意。此在衆生誦讀者。當自得之。其無以義爲讐。以負於著者藏者。訪者足者。施者刻者之心。

嘉靖丁巳歲冬十二月望日山陰徐渭撰

重刻太虛禪師法華大意跋

乙丑春湛然大師說法於海鹽。余往瞻覲。時常隨雲集約千衆。柱石梁公率大衆向余作禮。由此大意相囑。余刻華嚴疏鈔功尚未竣辭。公等切懇。唯唯承當。携至舟中。寓目數行。見其引太極中庸等語。懼爲狂慧誤解者之嚆矢。尚懷猶豫。及再讀之。合掌敬仰。知師的的見大意。蓋不以文字詮釋法華經。直以法華經爲自心註脚者。伶俐漢子見之。便可悟入。急當重較流通無疑矣。遂授之梓。以作後人眼目。至其稱引儒家言。亦一時爲陳白沙諸老方便。觀者勿竊影響。

80

1 2 3 4 5 6 7 8 9 10 1 2 3 4 5 6 7 8 9 10 1 2 3 4 5 6 7 8 9 10

徒滋混濁以資齒頰使自誤誤人墮落不淺若夫得意忘言者信知一切世諦文字無不從法界流出無障無礙爲一味法余言特饒舌耳天啓丁卯仲春八日長水葉祺胤識



徒至升中萬
元年阿難是歲也向
于某之言樂公
心丘春其然大相姑古外誠
山陝入聖輞神志華大意題



80 1

2 3 4 5 6 7 8 9

90 1

2 3 4 5 6 7 8

90 1

2 3 4 5 6 7 8

100 1

2 3 4 5 6 7 8

90 1

2 3 4 5 6 7 8

90 1

廿六

